

EUANGELIA LUKA DETARER.

¹ Abele mer gaire le giz elele detarare abkesem, abele mer keriba emetu erdarda,

² Mokakalam uiaba nakuarare keribim, ui ge emetu erdarare, pako memeg le giz ditimedada abele mer,

³ Abelelam kaka dikiapor, abele kai deraimer gaire lu uridili peirdi ika ditimedilu, kaka daotare abkesem marim, opole Teofilo;

⁴ Ueakai ma umele ageakar abele gaire lu, emetu mari ereuerem.

⁵ Abele kerker ge Heroda, Iudaia opole, nerute zogo kemle, abara nei Zakaria, Abia ra nosik: abara kosker, Arona ra boai, abara nei Elisabeta.

⁶ Ui barkak tonar Ade ra op ge, uiaba irmilei Iehoua ra mer gelar giz, nole asauersili kak.

⁷ Ui ge daralei nole uerem kak, abelelam Elisabeta E soaso, ui ge akailei aule bailei.

⁸ E ikerer tabara dorge, E zogo le Ade ra op ge, E tabara nosik erag,

⁹ Mokakalam zogo le la tonar, abara dorge E badarer Iehoua ra zogo meta ge, E urim iger debe laglag lu.

¹⁰ Uiaba gaire le lakub giz esorerapare adige, abele kerker iger debe laglag lu.

¹¹ Ege Iehoua ra angela de abi etomelu, tuter pek debe laglag lu bao ge.

¹² A Zakaria de abi emetu erdar, abele ge ezigmalu, au geum baruk.

¹³ Ege angela de abi detager, kega, Zakaria ae, ma nolea geum kak: abelelam mara esorarapare Ade de emetu asoli, mara kosker Elisabeta de ia mara uerem, keubu uaesemur abi nei atker loane.

¹⁴ A marim sererserer bai, iako gaire le sererege abielam:

¹⁵ Abelelam E aule Iehoua ra opem, nole uaina are kak, pako gorog, a mitkar Lamar Zogo abele ge, ditimedelu abele kerker ge E osmelu.

¹⁶ A darabgerare tababim Isaraela le ra omasker Iehouaim uiaba Ade.

¹⁷ E kekiam Elia ra op ge, a adigir gako saserim, a nerkep depeger abem a apuem a omaskerem, darapegerare uiabim asorkaklam debe pardalem a debe tonarem; a ege derser abged abkoreb Iehouaim.

¹⁸ A Zakaria etkalu abim angelaim, kega, Nalu atamelam iaka nakaielu umele nabailu? Na gabe, emetu kaka aule baida, pako kara kosker aule baida.

¹⁹ A angela eutumer abim detager, kega, Kakanali Gaberiela, kaka nakuei Ade ra op ge; kari pe tamarida iaka natomelu abele debe mer iaka marim.

²⁰ A dasmer, mabe te dabimdabim, baida nole mer agar kak, iski abele gerger abelegelam mabe kara mer ma desardili abele lu pem keubu erdare ageakar.

²¹ A ab gedge dekailare Zakaria mer aridarid, a uapum bakeam a Ade ra zogo meta.

²² A ege teosmelu adem, mer atager kak uiabim; uiaba abi damrare, ege kerker nerute

atamelam zogo meta ge, ege E opu darakiriare uiabim, ege E dabimdabim.

²³ A ege abara gerger desmulu, ege ko takomelu tabara boaiem.

²⁴ A ege keubu gerger basemerare abara kosker Elisabeta kem eskemer; ege E gumik dauer, a faife abara meb, a daraketarare,

²⁵ Ege Ade ikeli gerger karim, a kari uanasmerare, E adem depegi kara sirip.

²⁶ A ege abara meb sikes, Ade de angela temariklu, nei Gaberiela, Galilaiam a Nazaretaem,

²⁷ Abi gobar detager, Dauida ra boai kimiarem, a E Iosefai akemelu tababim kimiarem, abara nei Maria.

²⁸ Abele angela tababu abi detager, kega, Kaka au omare marim, Iehoua uadoa mari dog; ma uerkab kosker gaire kosker ge.

²⁹ Ege abi dasmer, ege abara okasosok baruk abele merlam, E dikiapore nalu lu pe omare dali.

³⁰ A angela de abi detager, kega, Maria ae, ma nole geum kak; abelelam Ade mari au omare.

³¹ Dasmer, ma keubu ia kem eskemer, ese ma esmeloa kimiare uerem, a nei etkeroa IESU.

³² E au kale, a nei etkeroa, Ageakar Opole ra Uerem: a Ade de abi nakuar ko emeri Dauida ra sik, abara aba:

³³ E opole obaina Iakobo ra boai ge; abara baselaia ge nole mop kak.

³⁴ Ege Maria de angela itimer, kega, Ua nade, ka nole kimiar ardar kak?

³⁵ A ge angela etkalu abim, kega, Lamar Zogo natabu, a Ageakar Opole ra adigir mari tumge;

abelelam mabara uerem zogo, tabara nei, Ada ra Uerem.

³⁶ Dasmer, mara boai Elisabeta, E aule, emetu kem eskemer abara kimiari uerem: sikes meb abele kerker, E soaso.

³⁷ Abelelam Ade umele gaire lu uridili E ikeli.

³⁸ Ege Maria de abi detager, kega, Kaka Iehoua ra memeg le; uao debele pema nakaida kari abkoreb mara mer. Ege angela de abi dakaelu.

³⁹ Ege Maria ekueilu abele kerker ge, dudumge bakeamulu dordor paserem, Iuda ra utebem;

⁴⁰ Ege E bakeamulu Zakaria ra meta ge balu, a Elisabeta eskos.

⁴¹ Ege Elisabeta de asor Maria ra nas, ege uerem dekumur a detatimir muige kem ge; pako Elisabeta ra mitkar Lamar Zogo;

⁴² Ege E ereretikri au kase, a detager, kega, Uerkab kosker ma, pako abele uerem uerkab osmeda.

⁴³ Nako abele lu, tabakeamud karim kara Opole ra apu?

⁴⁴ Dasmer, iski a ikeli kodo mer de, mara omare karim ka asoli, ege ko uerem bagererdilu muige kara kem ge sererege.

⁴⁵ Ege uerkab kosker ra oditur; abelelam ageakar mer Iehoua de pe etomeret abim.

⁴⁶ Ege Maria detaut, kega, Kara nerkep baospili Iehouaim,

⁴⁷ Ege kara nerkep au sererege Ade, E kari nazemoda.

⁴⁸ A akai lu Iehoua de dasmer abele abara kosker memeg nole aule kak: abele kerker ge ditimedelu, ege gaire nosik uerkab karim.

49 Abelegelam E dali au adigiri nagri, E gaire au lu karim ikeli; abara nei zogo le.

50 E au omare gaire le la geum, bauder gaire nosik.

51 Ege saserim tabara tag, E adem gaire le lagelage aule dikiapor uiaba nerkep.

52 Ege naimartare uader opole baolam, ege uader ge nogoka emereder ga baker aule.

53 Ege darasisilare uader le uiaba uerege debe leuer; uader luglug le no bakeuare.

54 Ege abi upiditidare tabara memeg le Israela, E abi au omare:

55 Aberahama pako abara omasker niaiem, mokakalam abim detaut meriba aba giz.

56 Ege Maria de abi dog, nako neis netate meb, gako akomeda tabara boaiem.

57 Ege bakedilu Elisabeta ra meb osemelu; ege kimiar uerem osemelu.

58 Ui aserare ge, abara boai giz, Iehoua au omare abi; ui ge sererege abim.

59 Ga eit gerger, uiaba egared abele uerem peritome; uiaba lagelage abi nei atker Zakaria, taba aba ra nei.

60 Ege abara apu ge uiabi detaut, kega, Nole abele; epe tabara nei Ioane.

61 Ui ge abi detagerare, kega, Mara ko boai obatkereda Ioane nei.

62 Ui ge abara aba opu mer detagerare, Ma pe nako ma dikiapore abara nei?

63 E ge uiabi daratagerare, kega, Seleti tekadarare karim; E detali, Abara nei Ioane. Ui ge au kasege damrare.

64 Ege akailu merkar etkalu, tabara uerut detue, E mer detaut, a au esoao Adim.

65 Ege uader maike abi dog ga erdarare uiabim ga geum barkare; abele mer dordor paser ge Iudaia ge ga esao.

66 Ui ge emetu aserare ga dikiaporare, kega, Nalu uerem dali? Abelelam Iehoua ra tag abi dog pako abi upinati.

67 Ege abara aba dauer Zakaria mitkar Lamar Zogo, E ekerer perofeta dorge, kega,

68 Esoao Isaraela ra Ade, Iehoua pedali; E meribi dasmer E meribi dazimoareta abara ged ge,

69 Iski sekerise meribim uerkab Dauida ra boai ge abara memeg le,

70 Mokakalam ge emeret ge, Iehoua de daratagerare gaire zogo perofeta,

71 Mamoro pemi uridili uader le gizlam pe meribi dirieda, tag abgered urkerem meribim;

72 E au omare meriba aba giz, gako dikiapor tom akoar zogo;

73 Beskak mer E nakuar Aberahama meriba aba,

74 E meribi dikuarda meriba azimoaret, uader tag au kelarkelar, meriba nole geum kak meriba memeg le,

75 E zogo pako oditireda abi op ge, gaire gerger uridili meriba eded.

76 A mama kebile ae, uiaba gaire le mari nei atker Ageakar Opole ra perofeta: abelegelam ma kekiam Iehoua ra opem derser abara gab ge;

77 Mamanali natomertare abele azigmoaret uiabim abara ged, pako adem dikri uiaba uit giz.

⁷⁸ Epe Ade pe meriba nasge dali, a kotor datki meribim.

⁷⁹ Datki ga baziarare gesepem kupikupiem, datki moar degrered meriba teter gab karem.

⁸⁰ Ege abele uerem ga batai, abara nerkep saserim, sumez ge emri, ga abi etomertare Isaraela le giz abi.

2

¹ Abele kerker ge Kaisara Augusto mer tigr, kega, Detaruem gesepem uridili.

² Abele kerker ditimedare abele jauali Kurenio sirdamu Suria ge.

³ Ui ge uridili bakeauare ga detarare, taba gedlam.

⁴ Ege Iosefa ge tabakeamulu Galilaia, Nazareta uteblam, Iudaiaim Dauida ra uteb, nei atker Bethelama, abelelam Dauida ra boai abara kus;

⁵ Detalei okakis Maria taba kosker ei, E dikia-por abi kem ko eskemer.

⁶ Ui ge emrilei, abele kerker ge abi esmelu.

⁷ Ege abara kimiar uerem esmelu; E sursur derap, egaredlu kau meta ge irdilu, abelelam uiaba meta mitkar nolea abkoreb emeri okakis.

⁸ Abele ged ge daralei sumez ge mamoe as-esered, ui ki ge daralei mamoe asesered.

⁹ Dasmer, Iehoua ra angela ege ekue ireder, au zoromzorom deraueirer Iehoua ra zorom: uiaba geum barkei.

¹⁰ Ege angela de uiabi daratagerare, Uaba nole geum kak; abelelam dasmerare, kaka tais peka uabim debe mer, obaker gaire le uridili au sererserer ober:

¹¹ Abelelam ge abele gerger ge eosmelu, Dauida uteb ge, Iesu Keriso, uaba Azigmoareta.

¹² Abele atamelam; Uaba erdar sursur uerem eid kau ra meta ge.

¹³ Ege dumdumge angela de okakis gaire urker ge kotor ge, epe uiaba desperare Iehoua, kega,

¹⁴ Ua ge desperare Ade ra kotor lu, uerkab ge gesepem, au omare le uridili.

¹⁵ Ege angela giz bakeauare kotorem, ui ge mamoe giz naseseredlare a mer nakesmurare, kega, Debele mi nabakeauare Bethelamaem, ko dasmerare abele lu Iehoua de meribi uadetametare.

¹⁶ Ui ge dudum bakeauare, ege Maria uiaba nardardare, a Iosefa, a sursur uerem kau meta ge iperedare.

¹⁷ Ege uiaba erdali, epe uiaba etomeret abele mer uiaba emetu asoli abele ueremlam.

¹⁸ Epe uiaba uridili emetu asoli abele mer; epe uiaba au damreda abele lu mamoe asesered le etomeret uiabim.

¹⁹ Ege Maria de erpei gaire mer uridili, abara nerkep dikiapor.

²⁰ Ege mamoe asesered le takomed, uiaba despereda pako esoao Adim, abelelam gaire lu uridili uiaba emetu asoli, pako dasmer etomeret uiabim.

²¹ Ege abara kerker tabarki, eit gerger abele uerem peritom, epe uiaba abi nei atker IESU, angela kekiam nei detker, abara apu nolea kem kak.

²² Ege eseamulu uiaba gerger ogdirup abi, mokakalam Mose ra gelar giz, epe uiaba tais abim Ierusalemaem, irdilei Iehoua ra opem,

23 (Mokakalam detarer Iehoua ra gelar giz, kega, Ese kimiar uerem narbet uridili zogo Iehouaim,)

24 Ese ikuar abele baokeilu, mokakalam etomeret Iehoua ra gelar giz, kega, Neis luk, ua nako neis kebi dibadib.

25 Ege dasmer, nerute le emeri Ierusalem ge, nei Simeona; abara tonar barkak E au geum Adim, epe abim naokaili upinati Isaraela; ege Lamar Zogo abi tumge.

26 Ege abi natomelu Lamar Zogo, nolea eumida, kekiam erdali Iehoua ra Keriso.

27 Ege E bakeamulu zogo meta Lamar Zogolam; abele uerem Iesu abara aba a apu uiaba abi tegaret, uiaba ikeli abkoreb mokakalam gelar giz,

28 Epe abi tegaret abele uerem abara tag, ege esoao Adim, kega,

29 Iehoua ae, debele ma ikuar mara memeg le uerkab bakeamulu, mokakalam mara mer;

30 Abelelam kara pone emetu dasmer abele mara azigmoaret,

31 Ege ma derser opem gaire ged uridili;

32 Abele datki erperida gaire zuber ged, pako zoromzorom mara ged Isaraela.

33 Ege Iosefa pako abara apu uiaba damered gaire lu etomeret abim.

34 Ege Simeona E uerkab uiabim, ege abi detager Maria abara apu, kega Dasmer, abele uerem iridi uader ekesmeri a ko ekuei gaire le lakub Isaraela; abele atamelam uiaba abi dedkoli;

³⁵ Ege ekos dikedilu mara nerkep teibur aosos tulik; ueakai paret kak dikiapor nerkep gaire le.

³⁶ Nerute perofeta kosker dauere, abara nei Ana, Fanuelu ra neur, Asera ra nosik; ege emetu aule, E ge taba kimiar okakis daralei abele kerker ge E neur dauer, ege sefen abara urut tabarki.

³⁷ Abele kosker zogo meta ge emeri, nako eiti foa abara urut, nole akaeret kak abele zogo metalam, E Ade ra memeg le, pako leuer baili, a esorerapare gerger ge a ki ge.

³⁸ Abele kerker ge, E bakeamulu esoao Adim, E abi detagerare uiabim gaire le giz naokaili Ierusalem a ra azigmoaret.

³⁹ Ege ui ge eseamulei gaire lu ikeli abkoreb Iehoua ra gelar giz, epe ui ge akomelei Galilaaem, uiaba uteb Nazareta.

⁴⁰ Ege abele uerem ge batai, abara nerkep au saserim, no au pardar dauer: Ada ra omare abi tum ge.

⁴¹ Ege abara aba a apu ui bakeamulei Ierusalem aem, nerute urut a nerute urut netpur paseka ge.

⁴² Ege abara urut tuelf tabarki, epe uiaba bakeauare Ierusalem aem, mokakalam tonar uetpur.

⁴³ Ege abara gerger desmulu, epe uiaba akomeda, abele uerem Iesu emeri Ierusalem a ge; ege Iosefa pako abara apu uiaba nolea umer kak.

⁴⁴ Ui ge dikiapore abele uerem uiabi okakis, ege uiaba ki gab ge asameilu; ui ge abi ge deraimerare taba boai giz pako uader umele abim.

⁴⁵ Ui ge nole abi ardar kak, a ui gako akomelei Ierusalemam, abi deraimerei.

⁴⁶ Ege thri gerger barkare, ui ge abi erdali zogo meta ge, ege emeri muige ereuerem ge, E lage-lage asoli, a gako uiabi nautumerare ereuerem tonarem.

⁴⁷ Ege uiaba asolare abim au pardar mer detaut, uiaba au damerare.

⁴⁸ Ege ui ge au kase damerei emetu abi erdarei; ege abi apuet detaut, kega, Kara uerem ma nalu pem a keribim? Dasmer, kaka pako mara aba ki au asi ki darasardei mari naraimerei.

⁴⁹ Epe tabara mer uiabi daratager, kega, Nalugem naba kari naraimereie? Uaba nole umer kak, abkoreb kaka emeri kara Aba ra meta ge idali?

⁵⁰ A ui ge nole abi mer asor kak nakueiredar.

⁵¹ Ege ui ge okakis bakeauare Nazareta tabarki; a uiaba memeg: ege apu ge gaire lu giz nerkep derpeilare.

⁵² Ege pardar ge omeilu a gako Iesu ra gem, ege Ade au omare abi gako le uridili.

3

¹ Ege fifitin urut abele kerker ge, Tiberio Kaisara emeri opole, Ponotio Pilato Iudaia sirdam, Heroda ge Galilaia opole, pako Filipino ra narbet Ituria opole pako nerute ged Trakoniti, pako Lusania Abilene opole,

² Ana gako Kaiafa uiaba zogo le giz, ege Iehoua ra mer abim tabakeam Ioane, Sakaria ra uerem, sumez ge.

³ Epe E bakeamulu nerute apek Ioridano ge, natomertare tonar obazgeda a bapataiso, ueakai uit adem dikri;

⁴ Mokakalam mer detali jauali ge Isaia perofeta, kega, Abele kodo mer ereretikri sumez ge, ueakai paret Iehoua ra gab, adem dirup.

⁵ A mitkar muimui uteb uridili, a gaire paser pako daip uridili nolea aule kak; gaire lu barbar ko barditug, pako uteb no baker ko ikeli debe gab.

⁶ Gaire le uridili dasmer azigmoaret Adalam.

⁷ Ege E uiabi detaut, kega, gaire le lakub abim tabakeuare uiaba lagelag bapataiso, Mama tabo ereg ra omasker ae, nete etomeret uabim debele derser Iehoua ra urker niaiem?

⁸ Debele uaba turum nagri abkoreb obazgeda, a uaba nerkep nolea dikiapore, kega, Aberahama keriba aba; abelelam kaka uabim detaut, Ade umele depegeli baker peike ko Aberahama ra omasker.

⁹ Abara tulik mena ikedili lu giz ge: ese gaire lu uridili nolea turum kak, ei uaesem urem uadikri.

¹⁰ Ege gaire le giz abi itimerare, kega, Nalu lu ki akerare?

¹¹ Ege E uiabim daratagerare, kega, Ese le nagri neis am uali, debele am uali kak le uaikuar; pako le nagri leuer, abkoreb ikeli mokakalam.

¹² Ege telona giz bakeauare abim, kega, Keriba lagelag bapataiso, Ereuerem le ae, nalu lu ki akerare?

¹³ Epe E uiabim detaut, kega, Uaba nole au kase dikiapore lu bodomalam uabim.

¹⁴ Ege uader ares le giz abi itimerare, kega, Nalu ki akerare? Epe E uiabim detaut, kega, Uaba nole urker nerute le, pako uaba nole bes mer nerute le; uaba mamoro emeri naokaili uaba bodomalam.

¹⁵ Abele ged ge dekillare, gako nerkep ge uiaba dikiaporare Ioaneim, nako Keriso pedali;

¹⁶ Ege Ioane de daratagerare, kega, Kai uabi bapataiso ni ge; ia nerute le tabakeam aule kari tumge, nole abkoreb kaka detue abara teter gab mukub: E uabi bapataiso abele Lamar Zogo, gako abele ur:

¹⁷ Abara tag nagri pat, E dirup abara kon etkemed; a E ais azirig metaem gaire kon nole puip kak, ege kon ra gegur E disirkilu abele ur umer kak esameilu.

¹⁸ Uader abara gaire mer okadeskeda etomeret abele ged.

¹⁹ Ege Ioane abi barditug Heroda opole, epe Herodialam Filipino ra kosker abi narbet, pako gaire lu adud Heroda ikeli;

²⁰ Ege abele lu etami okakis gaire lu uridili, E abi namarid Ioane abele au dubar meta ge.

²¹ Ege E bapataiso abele ged uridili, a ko Iesuim bapataiso, E esorerapare, ege abele kotor nakesmulu,

²² Epe abele Lamar Zogo uatabu abi tumge, abara roai mokakalam dibadib ise, ege abele kodo mer kotorlam, kega, Mama kara Uerem idali; kaka mari sererege.

²³ Ege Iesu, abara urut thirti tote, gaire le dikiaporare E Iosefa ra uerem, a ko Heli ra uerem,

24 A Matata ra uerem, a Leui ra uerem, a Meleki ra uerem, a Iana ra uerem, a Iosefa ra uerem,

25 A Matatia ra uerem, a Amosa ra uerem, a Nauma ra uerem, a Eseli ra uerem, a Nanga ra uerem,

26 A Maata ra uerem, a Matatia ra uerem, a Semei ra uerem, a Iosefa ra uerem, a Iuda ra uerem,

27 A Ioana ra uerem, a Resa ra uerem, a Zorobabela ra uerem, a Salatiela ra uerem, a Neri ra uerem,

28 A Meleki ra uerem, a Adi ra uerem, a Kosama ra uerem, a Elemodama ra uerem, a Eru ra uerem,

29 A Iose ra uerem, a Eliezara ra uerem, a Iorima ra uerem, a Matata ra uerem, a Leui ra uerem,

30 A Simeona ra uerem, a Iuda ra uerem, a Iosefa ra uerem, a Ionana ra uerem, a Eliakima ra uerem,

31 A Melea ra uerem, a Menana ra uerem, a Matata ra uerem, a Natana ra uerem, a Daida ra uerem,

32 A Iese ra uerem, a Obeda ra uerem, a Boasa ra uerem, a Salemona ra uerem, a Naasona ra uerem,

33 A Aminadaba ra uerem, a Arama ra uerem, a Eseroma ra uerem, a Faresa ra uerem, a Iuda ra uerem,

34 A Iakobo ra uerem, a Aberahama ra uerem, a Tara ra uerem, a Nakora ra uerem,

35 A Saruka ra uerem, a Ragau ra uerem, a Paleka ra uerem, a Hebera ra uerem, a Sala ra uerem,

³⁶ A Kainana ra uerem, a Afasada ra uerem, a Sema ra uerem, a Noa ra uerem, a Lameka ra uerem,

³⁷ A Metusela ra uerem, a Enoka ra uerem, a Iareda ra uerem, a Malelila ra uerem, a Kainana ra uerem,

³⁸ A Enosa ra uerem, a Seta ra uerem, a Adamu ra uerem, a Ade ra uerem.

4

¹ Ege Iesu takomeda Ioridanolam, ege abi Lamar Zogo mitkar, epe Lamar Zogo abi ais sumez ge.

² Ege diabololo de abi mirem. Abele foate gaire gerger E nolea leuer aro kak, gerger eseamulu: keubu abara uerer baruk.

³ Epe diabololo abi detager, kega, Ese ma Ade ra Uerem, debele ma detager baker peike de-pegemelu leuer.

⁴ Epe Iesu abi detaut, kega, Ege emetu detali, Nolea no leuer eroli ueakai le eded nagri, epe Ade ra merlam uridili.

⁵ Epe diabololo abi ais nerute au perepere paserem abi etomeret gaire baselaia, ege daradgeredi.

⁶ Epe diabololo abi detager, kega, Kaka mari ikuar abele sirdam uridili, pako uiaba zorum: abelelam emetu karim ikuar; ese nerute le kaka lagelage, kaka abim nakuar.

⁷ Ese ma esorgiru karim, kaka marim ikuar gaire lu uridili.

⁸ Epe Iesu abim detaut, kega, Satana, ma adem bakeam kara sorge; abelelam emetu detali, Ma esorgiru mara Ade, ege abi memeg le tepteb.

⁹ Ege E abi ais Ierusalemalem, ege abi ekue tumge abele zogo meta ge, a abi detager, kega, Ese ma Ade ra Uerem, ma eupumar abele uteblam:

¹⁰ Abelelam emetu detali, Iehoua mer tigri, Abara angela giz upinati marim:

¹¹ Uiaba marim tegareda uiaba tag, ueakai mara teter nolea baker itut.

¹² Epe Iesu abim detaut, kega, Abele mer, kega, Ma nolea mirem abele Opole mara Ade.

¹³ Ege diabololo abara mirem uridili eseamuda, epe E adem bakeam.

¹⁴ Epe Iesu ko akomeda Galilaaem, Lamar abim au adigiri; ege gaire le asoli abara tonar deraueli apek uridili.

¹⁵ Ege E ereuerem uiaba sunagoem, ege gaire le uridili abi despered.

¹⁶ Ege E Nazareta tabarki, ege E bataili abele ged ge: epe E barot abele sunago sabath ge, mokakalam abara tonar, ege E tekue ko etag.

¹⁷ Ege abim ikuar jauali Isaia perofeta. Epe E diski abele jauali, epe nagri abele mer emetu detali,

¹⁸ Ege kari tumge Lamar Opole, abelelam E kari depegili etomeret abele mer uader nolea lu kak; ege E kari namarid idigiri uiaba nerkep okasosok, etomeret debe mer uader nolea uteb kak, pako diski pone sadmer, pako omare uader asiasi gaire gerger,

¹⁹ Ko etomeret urut Opole sererege.

²⁰ Ege jauali ditarat, E ikuar memeg le, ege lokod ge emeri: epe gaire le dasmerare abim sunago ge.

21 Epe E ditimeda detagerare uiabim, kega, Abele gerger ageakarem abele jauali, uaba aser-are.

22 Ege uiaba uridili abi despered, ege uiaba au dameded gaire debe mer abara telam. A uiaba detaut, kega, Nako Iosefa ra uerem pedali?

23 Epe E uiabim daratagerare, Abkoreb uaba karim detaut, Lukup kemle, mabu idigiri: gaire lu uridili ma ikeli Kapernauma, ki emetu asoli, debele ma ikeli mara ged kar peike.

24 Ege E detager, kega, Ageakar, kaka uabim detaut, Nolea abkoreb perofeta emeri abara ged kar.

25 E ko detager, kega, Ageakar, kaka uabim detaut, Abele kerker Elia emeri Isaraela, uader kosker uiaba kimiar eumid, epe kotor dimi thri urut pako sikes meb, abele ged uridili uererege;

26 Epe Elia nolea bakeam uiabim, ege no Sarefta, Saidona ra uteb, a nerute koskerim abara kimiar emetu eumid.

27 Ege emeri Isaraela uader lepera, abele kerker Elisaia perofeta emeri; a uiaba nolea le ogarup kak, ege no Naamana, Suria le.

28 Ege uiaba asoli abele lu, uiaba sunago ge ueku nagri;

29 Ege uiaba ekue, a abi emarid nerute apek, ege uiaba abi tag erpei egardare nerute muimui uteb paserem uiaba uteb, ueakai uiaba abi bataueret muige.

30 Ege E ekasereder uiaba opem, a bakeamulu.

31 Epe E bakeamulu Kaperanauma, Galilaia ra uteb. Ege E uiabim ereuerem sabath ge:

³² Ege uiaba au damered abara merlam; abelelam abara mer nagri sirdam.

³³ Nerute le sunago ge emeri, E nagri lamar uit demoni giz; ege E ereretikri au kase,

³⁴ Kega, Uai! Iesu Nazareta le, ma nalugelam keribim? ege ma tabakeamulu ueakai keriba baum? ege kaka umele marim, Ade ra Zogo.

³⁵ Epe Iesu abi daisumda, kega, Bamer, ma adem osmeda abielam. Epe demoni abi ekesmeri uiabi opem, epe abim osmeda, nolea adud nagri.

³⁶ Epe uiaba uridili au damered, ege uiaba mer atager, kega, Nalu abele mer? E dali nagri adigiri pako sirdam, abelelam E uiabi daisumda uit lamar giz, epe uiaba adem osmed adige.

³⁷ Epe abele mer abielam gaire le asolare gaire apek uridili.

³⁸ Ege dekaelu abele sunago, E barot Simona ra meta: ege Simona ra kosker abara apu nagri gim, gem urueri, au kale; ege uiaba abim damosi.

³⁹ Epe E ekue maike abi dog, ege abi daisumda abele gim urueri; epe sobkak eseamud: epe E ekue, a uiabi memeg le.

⁴⁰ Uiaba uridili nagri gim, nerute gimlam a nerute gimlam, ege uiaba tais uiabim lem baraigida; ege abara tag itut nerute le a nerute le, pako idigiri uiabim.

⁴¹ Ege gaire demoni giz uiaba osmed, ereretikri, kega, Mamanali Keriso Ade ra Uerem. Ege E uiabi daisumda, ege uiaba umer kak mer atager abim; abelelam uiaba umele E Keriso.

⁴² Ege gerger ge, epe E osmed, E bakeamulu nerute le kak uteb: ege gaire le lakub giz uiaba

abi deraimerare, epe abim tabakeauare, a uiaba abi erpeilare, ueakai E nolea bakeamulu abele gedlam.

⁴³ Ege E uiabim detager, kega, Abkoreb kaka marau Ade ra baselaia gaire ged: abelelam kaka emarid.

⁴⁴ Epe E marau abele sunago giz Galilaia ge.

5

¹ Ege E ekue nerute pek, abele ni Genesareta ge, ege gaire le lakub uiaba esaimelu, uiaba lagelage asolare Ade ra mer.

² Epe E erdali neisi nar gur tauer nerute apek abele ni ge; nolea le kak, uiaba bakeauare net ogarup.

³ Epe E bakeamulu nerute nar ge, Simona ra nar, E abi damosi, Ma elele ami abele nar nerute apek abele ni ge. Epe E emeri lokod ge, E uiabi ereuerem, gaire le lakub, abele narlam.

⁴ Ege abara marau eseamulu, E abi detager Simona, Ma elele abele keper ge, ueakai uaba net esapili, a lar nagri.

⁵ Simona abi detager, kega, Opole, abele ki ge keriba au sagim, nolea lar nagri: epe mara mer nagri, abelelam kaka net ko bataueret.

⁶ Abele lu uiaba emetu ikeli, epe uiaba net esapili gaire lar mitkar; epe uiaba net batoatare:

⁷ Ege uiaba opu darakiriare uader emeri nerute nar ge, tabakeauare uiabi upidarati-dalare. Epe uiaba tabakeauare, ege neisi nar mitkar, maike bataili.

⁸ Ege Simona Peteru umele, epe abi ekesmeri Iesu ra teter ge, kega, Opole, ma bakeamulu karielam, abelelam kaka uit le.

⁹ Abelelam E abi damered, pako uader kemem abim, abelelam gaire lar uiaba nagri;

¹⁰ Ege mokakalam Iakobo pako Ioane, Zebedαιο ra omasker, uiaba larem okakis Simona. Epe Iesu abi detager, Simona, Ma nolea geum kak; ditimed peirdi gaire le nagri marielam.

¹¹ Ege uiaba nar akaridalie, epe uiaba gaire lu uridili dikaer, a uiaba abi irmili.

¹² E bakeamulu nerute uteb ge, nerute le nagri gim, abara gem lepera mitkar: ege E Iesu erdali, epe abim ekesmeri tabara opem, E abi damosi, kega, Opole, ese ma lagelage, ma umele kara gem ogdirup.

¹³ Epe abara tag itrimud, E abi itut, kega, Kaka lagelage; mari ogdirup. Epe abara gim lepera akaid.

¹⁴ Epe E abi detaut, Ma nolea etomeret nerute le: debele ma bakeam abi etomeret abele zogozogo le, ma abi ais tonar ogdirup, mokakalam Mose ra gelar giz, ueakai uiaba umele abele atamelam.

¹⁵ Abele mer E osmed, gaire le asolare abim: epe gaire le lakub giz tabakeauare uiaba lagelage abi asolare, pako idigiri uiaba gim.

¹⁶ E bakeamulu le kak uteb, ege esorerapoilu.

¹⁷ Nerute gerger, E uiabi ereuerem; ege Faresaio giz pako ereuer le abele gelar giz, uiaba tabakeauare nerute uteb Galilaialam, pako Iudaia, pako Ierusalem; ege nagri Opole ra adigiri, abelelam E nadgirare uiabim.

18 Dasmer, nerute le uiaba tegared taba siklam gim nagri E ibibi; uiaba lagelage abim tegared, a abi ais Iesu ra opem.

19 A uiaba nolea umer kak, abelelam abele meta mitkar gaire le lakub, epe uiaba bakeauare meta tumge ezagerare Iesu muige, a lemlem ismi, uiaba sik dikri gim le tumge igimerare.

20 Ege E erdali uiaba oituli, E abi detager, kega, Mara uit emetu idigiri.

21 Epe aotale giz pako Faresaio giz uiaba dikiaporare, kega, Nete le dali E adud mer Adim? Nete umele uit idigiri, no Ade tepteb?

22 Epe Iesu erdali uiaba dikiaporare, E uiabi detaut, kega, Nako dikiaporare uaba nerkep?

23 Nako lu nolea beber, kega, Ege mara uit adem dikri: nako, Ma ekue bakeam?

24 Abelelam ueakai uaba umele Ade ra Uerem, E nagri sirdam geseb ge uit dikri, (ege E abi detager ibibi le,) Kaka mari detager, Ma ekue, bakeam ais mara sik, a bakeam mabara meta.

25 Epe E ekueid uiaba opem, ege tabara sik ekau, a bakeam tabara meta, E Adim naospered.

26 Uiaba uridili au damrare, uiaba naospered Adim; ege uiaba au geum, kega, Abelelam kerkar abele lu meriba erdalare abele gerger.

27 Ege abele lu eseamulu, epe E osmed, ege E erdali nerute telona giz, abara nei Leui, ege E emeri meta dipumed: E abi detager, kega, Kari narmili.

28 Epe gaire lu uridili dikaer, E sobkak abi irmili.

²⁹ Ege Leui E ikeli uetpur abara meta ge abim: gaire telona giz abi kemem, pako uader uteid baiter uiaba eroli okakis

³⁰ Faresaio giz a aotale giz, uiaba mudi mer abara kaimeg giz, kega, Nalugelam uaba eroli a erehi okakis telona giz a uit le giz?

³¹ Iesu uiabim detaut, kega, Saserim le giz lukup kemle lakak; gim le giz laglag.

³² Kaka nolea tabarki ko gaire barkak tonar dabgeri, debele gaire uit le giz, ueakai uiaba obazgeda.

³³ Ege uiaba abi detaut kega, Nalugelam Ioane ra kaimeg giz leueru baili, pako esorerapare, pako Faresaio ra kaimeg giz; ege mara kaimeg giz uiaba eroli a erehi?

³⁴ Ege Iesu uiabim detager, kega, Nako, umele gaire boai le ispida ko leueru baili, le ispida uiabi dog?

³⁵ Kerker niai tabarki; le ispida uiabelam egared, abele gaire gerger uiaba leueru baili.

³⁶ Ege E uiabim detager, nerute mer babisdarie, kega, Nole le kerkar mog uali itkedi okakis buzibuzi am uali; kerkar mog ualilam ekep itkedi, iako kerkar mog ualilam nole abkoreb buzibuzi am uali.

³⁷ Nole le epaiteret kerkar uaina muige buzibuzi tarpor giz; epe tarpor giz arperiklam, uaina epaiteredoa, epe sor giz adud.

³⁸ Ese ko kerkar tarpor giz sorem, debele epaiteret kerkar uaina, ueakai debele.

³⁹ Nole le erehi emeret uaina, a iako ko sobkak lagelag kerkar uaina: abelelam E detager, kega, Emeret uaina debele.

6

¹ Abele sabath ge nener kekiam gerger, E iako ekas kon gedub ge; epe abara kaimeg giz kon itarakerare, ege uiaba tag itmerare, a uiaba eroare.

² Ege uader Faresaio giz uiabim daratagerare, kega, Nalu uaba lu akerare nole abkoreb sabath ge?

³ Iesu uiabim detaut, kega, Nako uaba nole etage Dauida de ikeli, leuer aro kak, uerer eudili, a gaire abara kaimeg giz;

⁴ E Ade ra zogo meta ge balu, E erdali areto derser, E eroli, a uiabi nakuarare uader abi kemem; abele leuer nolea abkoreb nogle eroli, no zogozogo le giz tepteb?

⁵ Ege E uiabim detager, kega, Abele Le la Uerem sabath opole.

⁶ Nerute sabath ge, E iako sanago ge balu, E uiabi ereuerem: nerute le abara tuter tag euselu.

⁷ Ege aotale giz pako Faresaio giz uiaba abi deraimerare, nako, E idigri sabath ge; ueakai nagri mer ais abim.

⁸ E umele uiaba dikiapore; epe E abi detager, nerute le tag euselu, Ma ekue, E ekue muige. E sobkak ekue.

⁹ Epe Iesu uiabim detager, Kaka uabi nautumerare nerute lu, Nako, abkoreb omare abele sabath ge, nako nolea? nako eded, nako ipit?

¹⁰ Ege E abi darasmerare uiaba uridili, epe abi detager, nerute le tag euselu, Mara tag itrimud. Epe E ikeli abkoreb: epe abara tag debele, mokakalam nerute.

¹¹ Epe uiaba au urker; ege uiaba mer atager nalu lu uiaba ikeli abkoreb Iesuim.

¹² Abele gaire gerger, Iesu bakeamulu nerute paser ge E esorerapare; E Adim damosi ki ge ueeseamur.

¹³ Ege gerger ge, epe dabgiri abara kaimeg giz; E depeger tuelf le, ege uiabi nei atker Aposotolo;

¹⁴ Simona, nei atker Peteru, pako Anederia tabara keimer, a Iakobo pako Ioane, a Filipino a Batolomaio,

¹⁵ A Mataio a Toma, a Iakobo Alefaio ra uerem, pako Simona, nei atker Zelote,

¹⁶ A Iuda Iakobo ra uerem, pako Iuda Isakari-ota, abi keserkeser;

¹⁷ Ege E bakeam okakis uiabim, E ekue debe uteb, pako abara kaimeg giz, pako gaire le lakub Iudaialam, pako Ierusalemalam, pako nerute apek Turo a Sidona, ege uiaba tabakeauare lagelage abim asoli, a uiaba dikiapore uiaba gaire gim, E uiabi nadgirare;

¹⁸ Uader au asiasi uit lamar, ege E uiabi idigiri.

¹⁹ Ege gaire le lakub uridili uiaba lagelag abi dog ekepili: abelelam E nagri adigiri, ege uiaba uridili idigiri.

²⁰ Ege E dasmer abara kaimeg giz, E uiabi detager, kega, Uerkab uaba nolea lu kak: abelelam uaba Ade ra baselaia ge.

²¹ Uerkab uaba uererege peirdi: abelelam uaba kem osmeda. Uerkab uaba ezoli peirdi: abelelam uaba sererege.

²² Uerkab uaba uader au urker uabim, pako uabim daratirieda, pako dedkoli uaba nei mokakalam adud lu, Le la Ueremlam.

²³ Debele uaba sererege abele gerger ge, pako uaba eupemad a sererege: abelelam, dasmer, nagri kotor ge uaba bodomalam: abelelam abkoreb uiaba aba ikerare mokakalam gaire perofeta giz.

²⁴ Mokakalam, uaiai, uaba lu giz ra apu! abelelam uaba nagri debele.

²⁵ Uaiai, uaba kem osmed! abelelam uaba uererge. Uaiai, uaba sererege peirdi! abelelam uaba okasosok, pako ezoli.

²⁶ Uaiai, uader uridili dede mer uabim! abelelam uiaba aba ikeli abkoreb mokakalam perofeta bes.

²⁷ Epe kaka uabim detager, uaba asoli kara mer, Uaba omare le uabim derarti, pako uaba debe mer uader nolea omare kak,

²⁸ Uaba uerkab le kupeiatimed, uaba esorera-pare uader bes mer uabim.

²⁹ Ese nerute le mari ipit mara ikabu tetapim, ma ikuar nerute ikabu tetapim; ese nerute le ais mara au am uali, ma nolea daisumda mara gem uali.

³⁰ Debele ma nakuarare uader uridili mari namosed; ese nerute le mara lu gatkam le, ma nolea ko tais.

³¹ Mokakalam uaba nerkep dikiaporare uiaba ikeli abkoreb uabim, debele uaba ikeli mokakalam.

³² Ese uaba omare uader omare uabim, nalu esoao abkoreb abele lu? abelelam gaire uit tonar le giz omare uiabim, uiabi omare.

³³ Ese uaba debe dorge ikeli uiabim, gaire le uabim debe dorge, nalu uaba esoao abkoreb abele lu? abelelam gaire uit le uiaba ikeli abele lu.

³⁴ Ese uaba ikuar mani uader damosi uabim, a uaba ko dikiapore keubu nagri lu, nalu esoao abkoreb abele lu? abelelam uit le ikuar mani le damosi, ueakai nagri lu abkoreb.

³⁵ Debele uaba omare uader uabim derarti, pako urker uabim, debele uaba debe dorge uiabim, pako ikuar mani uader uabi damosi, uaba nolea dikiapore lu abkoreb; ueakai bodomalam nagri, uaba Ade ra omasker: abelelam E omare uit le, pako gaire adud le.

³⁶ Debele au nasenase uaba omare, mokakalam uaba Aba, abara omare au nasenase.

³⁷ Ua nole abi meratager kak, iaueakai uaba ko nole abi meratager: uaba nolea bodomalam uiabim, ueakai uaba nolea bodomalam: debele uaba adem dikri uiaba uit, ueakai uaba uit adem dikri:

³⁸ Debele uiabim ikuar, ueakai uabi ikuar; E uiabim ikuar debe uali E badigamo, E sapili pako dikri, E mitkar osmed adige, abelelam uaba turum nagri, a ko uaba turum nagri.

³⁹ Ege E uiabim detager nerute abara mer babisdarie, kega, Nako, umele nerute sadamer tegaret nerute sadamer? epe nako uiaba neis okakis ekesmeri ao ge?

⁴⁰ Kaimeg giz nole aule kak abara ereuer le: mokakalam abara ereuer le, debele.

⁴¹ Nalugelam ma dasmer lu puiپی nerute le la pone ge, ma nolea umer kak au lu mara pone ge?

⁴² Nalugelam ma abi detager, mara le, Karim mara pone, kaka adem abele lu puiپی mara pone ge: ma nolea umer kak au lu mara pone ge? Ma bes le, ma kekiam adem abele au lu mara

pone ge, ueakai ma umele adem puipi nerute le la pone ge.

⁴³ Umer kak lu debele adud turum nagri; pako lu adud umer kak debe turum nagri.

⁴⁴ Abelelam gaire lu turum nagri, ueakai gaire le umele. Abelelam nolea le etobemed suke ra turum zegerzeger lu, pako nolea le etobemed turum uina ge dardar lu.

⁴⁵ Ege gaire le debe E tais lu debele lu debele tonar, E ikedi muige abara nerkep; abele le adud E tais lu adud lu adud lam E ikedi abara nerkep; abelelam gaire lu muige E abi etomeret abara te.

⁴⁶ Nalugelam uaba etomeret karim, Opole, Opole, a uaba nolea ikeli mokakalam kara mer?

⁴⁷ Ese nerute le karim tabakeam a asoli kara mer, pako E ikeli, kaka uiabi etomeret le mokakalam abim.

⁴⁸ Mokakalam nerute le ikeli abara meta, E daiui muimui, E ikedi giz ge neid ge: epe ni dodo au kase babuselu, ege umer kak dimali: abelelam abele giz E ikedi neid ge.

⁴⁹ Ese nerute le asoli, a nolea ikeli, E mokakalam le ikeli abara meta tumem sep ge, nolea giz kak: ege abele ni dodo au kase babuselu, epe abele meta mogem erapei.

7

¹ Ege abara mer uridili eseamulu, abele ged uiaba asorare, epe E iako bakeamulu Kapere-nauma ge.

² Ege abele le, asesered netat handed, abara memeg le E nagri gim maike eumid, E abim au omare.

³ Ege E asoli Iesu pedali, E namarid aule giz Iudaia Iesuim damosi E bakeam abara meta ge, E lagelage idigiri gim le, abara memeg le.

⁴ Ege uiaba tabakeauare Iesuim, epe uiaba au elele damosi, kega, Abkoreb, abele le, ma ko ikeli abara lag;

⁵ Abelelam E au omare meriba ged, ege E ikeli keriba sunago.

⁶ Epe Iesu bakeamulu gaire le abi kemem. Ege E maike meta ge, epe le, asesered netat handed le, E namarid abara boai Iesuim, kega, Opole, nolea abkoreb ma barot muige kara meta ge.

⁷ Abele lu kaka dikiapore nolea abkoreb kak bakeam marim; debele no mara mer, ueakai kara memeg le adem idigiri abara gim.

⁸ Abelelam kaka nerute le E sirdam karim, kaka sirdam uader ares le: ese kaka abi detager nerute le, Ma bakeam, E bakeam; pako nerute le, Tabakeam, E tabakeam; pako kara memeg le, Ma ikeli abele lu, E ikeli.

⁹ Ege Iesu asoli abele lu, E abi damared; E egreemalu, E uiabim detager, gaire le lakub uiaba abi irmili, Kaka uabim detager, Kaka nole umer kak nerute Israela le nagri au oituli mokakalam.

¹⁰ Ege uader namarid, a uiaba akomed meta ge, uiaba erdali abele memeg le, E gim gim, abara gim emetu akaida.

¹¹ Kebi gerger, E bakeamulu nerute uteb ge, nei atker Naina; ege uader abara kaimeg giz E uiabi kemem, pako gaire le lakub.

¹² Ege E maike te abele uteb ge, dasmer, uiaba bakuare nerute le emetu eumid, abara apu E

netat abara uerem, abara kimiar emetu eumid: abele ged gaire le emeri abi dog.

¹³ Ege Opole abim erdali, E au omare a au nasenase abim, ege abi detager, Ma nolea ezoli.

¹⁴ Ege E bakeam maike, E itut abele bao; epe, uiaba bakuare le eumid, uiaba ekue. E abi detager, Makeriam, kaka marim detager, Ma ekue.

¹⁵ Epe, abele le eumid, E emeri, E mer etkalu. Epe E ikuar abara apu.

¹⁶ Ege uiaba uridili au geum: ege uiaba Adim naospered, kega, Ege E ekue meribim abele perofeta, E au kale; Ade E dasmer abara ged.

¹⁷ Ege abele mer abielam deraueli Iudaia uridili, pako nerute apek.

¹⁸ Ege Ioane ra kaimeg giz gaire lu uridili uiabi abi etomertare.

¹⁹ Epe Ioane dabgiri abara kaimeg giz neis le, ege uiabi namariklu Opoleim, kega, Nako mama le tabakeamu, nako keriba naokaili nerute le?

²⁰ Ege ui bakeamulei Iesuim, kega, Ioane Bapataiso keribim namarid marim, E detager, kega, Nako mama le tabakeam, nako keriba naokaili nerute le?

²¹ Abele gerger gaire gim le E idigiri, pako asiasi gim, pako demoni giz; pako ikuar ueakai gaire le pone sadmer uiaba bakaerti.

²² Epe Iesu uiabim detaut, kega, Ua bakeamulam, uaba etomeret Ioaneim gaire lu uaba emetu erdali, pako lu uaba emetu asoli; sadmer bakaerti, pako ibibi le emetu ekasereder, pako lepera emetu ogdirup, a grip eudgamad emetu

diski asoli, uader eumid uiaba ko ekuei, a debe mer marau uiabim uader le nolea lu kak.

²³ E uerkab le, nolea mudi mer karim.

²⁴ Ege Ioane ra kaimeg giz ui bakeamulei, epe E marau gaire le lakub Ioaneim, Nalu lu uaba bakeauare sumez ge erdalare? nako abele mebud uag demali?

²⁵ Nalu lu uaba bakeauare erdalare? nako le am uali gebgeb? Dasmer, uader am debe uali, pako debe leuer eroare, uiaba mamoro emeri opole ra meta ge.

²⁶ Nalu lu uaba bakeauare erdalare? nako perofeta? Ageakar, kaka uabi detager, E aule perofeta giz.

²⁷ Abelelam, E pedali, abele mer detali abim, Dasmer, kaka emarid kara merkem le mara opem, E paret mara gab mara opem.

²⁸ Kaka uabim detager, Nolea perofeta osmelu koskerlam aule mokakalam Ioane Bapataiso: epe le kebile Ade ra baselaia ge, E aule abim.

²⁹ Abele ged uiaba Adim naospered abele mer uiaba emetu asoli, pako telona giz, abelelam Ioane E uiabim bapataiso, abara bapataiso.

³⁰ Epe Faresaio giz, pako ereuer gelar giz, uiaba adem Ade ra sirdam, abelelam uiaba nolea lagelag abara bapataiso.

³¹ Ege Opole detager, Abele nosik, nako lu mokakalam kaka uiabim natomeret? nako lu uiaba koreb?

³² Mokakalam kebile giz uiaba emeri zegur uteb ge, uiaba dabgiri, kega, Ege keriba sirumer uabim, a uaba nolea sererege baberkeri; ege keriba au ezoli uabim, a uaba nolea ezoli keribim.

³³ Abelelam Ioane Bapataiso tabarki, nolea areto eroli, a nolea uaina ereli; a uaba detager, kega, E nagri demoni abi dog.

³⁴ Ege Ade ra Uerem tabarki, E eroli, a ereli; a uaba detager, kega, Dasmer, abele le E au lagelag leuer eroli, a pako uaina ereli, telona giz la le pako uit le!

³⁵ Abele le pardale, E gaire abara uerem, E debe mer abim.

³⁶ Ege nerute le, Faresaio giz, E abi detager, Meriba eroare okakis. Ege E bakeamulu Faresaio ra meta, epe E eidi, a eroli.

³⁷ Dasmer, nerute kosker abele uteb, abele kosker E uit le; ege emetu erdali E eidi eroli Faresaio ra meta, epe E tais nerute tarpor, debe laglag mitkar,

³⁸ E ekue isorge Iesu ra teter, E ezoli, ege abara ebeb babused Iesu ra teter, E idigiri abara mus, E eskos abara teter, pako desao abara gem abele lukup, debe laglag.

³⁹ Ege Faresaio le umele Iesu E mer abim, epe E dikiapore muige abara nerkep, Ese abele le E perofeta, nako E umele abele kosker, pako abara tonar, ege E abi itut: abelelam abele kosker E uit le.

⁴⁰ Epe Iesu abi detager, kega, Simona, kara mer marim, ege E abi detager, Ereuer le, ma detager.

⁴¹ Neisi le uiaba damosi nerute le ra mani: nerute le abi damosi denari faif handed, a nerute le fifte.

⁴² Ege uiaba nolea mani nakuar abkoreb abara mani, epe E uiabi omare, E idigiri uiabim nolea

ko dikiapore bodomalam abara mani. Debele ma kari detager, Nete aule abara omare abim?

⁴³ Ege Simona mer etkalu, kega, Kaka dikiapore, abele le gaire abara mani E abi idigiri. Ege E abim detager, Mara mer barkak.

⁴⁴ Epe Iesu egreemalu abele kosker, ege abi detager Simona, Nako, ma umele abele kosker? Kaka balu muige mara meta, ma nolea tais ni kara teter ge: epe abele kosker abara ebeb E babused kara teter ge, E idigiri abara mus.

⁴⁵ Ma nolea karim eskos: epe E dali, nolea ner kak karim eskos, abele ge ditimedlu abele meta ge balu.

⁴⁶ Ma nolea desao kara kerem abele lukup de: epe E dali, E desao kara teter abele lukup, debe laglag.

⁴⁷ Abelelam, kaka detager marim, Ege gaire abara uit uridili emetu idigiri; abelelam E au omare: epe le kebile abara lu emetu idigiri, abara omare kebile.

⁴⁸ Ege E abi detager, abele kosker, Mara uit emetu idigiri.

⁴⁹ Uader uiaba eidi eroare, a uiaba dikiapore muige uiaba nerkep, Nete le dali, E idigiri uit?

⁵⁰ Ege E abi detager, abele kosker, Ma eded abelelam ma oituli; Ma uerkab bakeamu.

8

¹ Keubu, Iesu iako deraueli gaire ged pako gaire uteb, ege E etomeret debe mer Ade ra baselaia ge: ege abara kaimeg giz, tuelf le, uiaba emeri abi okakis,

² Pako uader kosker nagri gim pako lamar uit emetu idigiri, Maria Magdalena, epe E sefen demoni giz abi dog emetu imuda,

³ Pako Ioana, Kusa ra kosker, Heroda ra memeg le E sirdam, pako Susana, pako uader kosker, uiaba abim memeg le uiaba lu.

⁴ Ege gaire le lakub uiaba etami okakis, ege uiaba tabakeauare nerute gedlam a nerute gedlam, epe E uiadim detager nerute mer babisdarie:

⁵ Nerute amorda le bakeamu ko emor: ege abara saido dikri, epe uader abele kep abi gab ge; uader bakeauare abele gab uiaba teter temaiseletare, a pako ebur giz uiaba eroli.

⁶ Uader kep abi uteb neid ge; ege E omeili, epe E uatuet, abelelam nolea bebeb.

⁷ A uader kep abi lu daradara ge; epe okakis omeili lu daradara ge, epe E detarapi.

⁸ Ege uader kep abi debe seb ge, E omeili, E turum nagri, uader uan handed. E detager abele gaire lu, epe E ereretikri, kega, Le la grip nagri ko asoli, debele E asoli.

⁹ Ege abara kaimeg giz abi itimer tonar abele mer babisdarie.

¹⁰ Epe E mer etkalu uiabim, Emetu ikuar uabim iaueakai uaba umele gaire lu gumik Ade ra baselaia ge: epe uader mer babisdarie uiabim gaire le; iaueakai uiaba nolea dasmer, uiaba dasmerare, pako uiaba nolea asoli, uiaba aserare.

¹¹ Tonar abele mer babisdarie: abele saido, Ade ra mer pedali.

¹² Abele uader le gab ge emeri, ege uiaba asoli; epe Satana tabarki a abele mer uiabi nerkep ge emor ekadari, iaueakai nolea oituli, a nolea eded nagri.

¹³ Abele uader tumem neid ge, uiaba abole mer asoli, a sobkak sererege erpei; a uiaba nolea sip kak, a uiaba no neisi neisi gerger oituli, abele gerger mirem tabarki, uiaba sobkak bakesmeri.

¹⁴ Abele uader lu eipu daradara ge emor, uiaba abele mer asoli, uiaba bakeauare epe gaire dikiapore lu lag geseb ge uiaba nerkep ge badari, pako geseb lu okardarem, pako uader lu lag, abele mer etarapi, abelelam turum nolea ageg.

¹⁵ Abele uader emor debe seb ge, uiaba abele mer asoli, a mamoro epeili, ageakar erpei uiaba nerkep ge, a turum nagri.

¹⁶ Nolea le lamepa dislik ispilu tanelu ge, pako ikedi sik lokodo ge; debele ikedi tumem giz lamepa ge, iaueakai nagri datki uiaba tabakeauare barot abele meta.

¹⁷ Abelelam nole lu ispilu, a nolea opasereret kak; pako nole mud ge lu, a nolea akmer kak, epe keubu etomeret.

¹⁸ Abelelam, debele uaba mamoro asoli: abelelam le nagri lu, a ko abim ikuar; epe le nole lu kak, a ais abielam abele lu E dikiapore abi dog.

¹⁹ Ege abara apu, pako abara keimer giz, uiaba tabakeauare abi deraimerare, a uiaba umer kak abi maiem, abelelam gaire le lakub.

²⁰ Ege uader uiaba abim detager, kega, Ege mara apu pako mara keimer giz uiaba adige ekue, uiaba lagelag marim erdali.

²¹ Ege E uiabim detaut, kega, Ese gaire le giz asoli Ade ra mer, a uiaba ikeli, uiaba kara apu a kara keimer giz.

²² Ege nerute gerger, E bakeamulu, okakis tabara kaimeg giz, a nar atiem; ege E uiabim detager, kega, Mi nabakeauare nerute apek abele keper ge: epe uiaba atiem.

²³ Ege uiaba atiem, E uteidi: epe au uag tabarki abele keper ge; ege gaire zauber nar etatkoi, a mitkar, maike E baitili, uiaba au geum.

²⁴ Epe uiaba tabakeam, a abi itir, kega, Opole, opole, keriba maike baume. Epe E tekue, a uag daisumda, pako abele au zauber: uiaba ekeamulu, iauaekai metalug.

²⁵ Ege E uiabim detager, Nade uaba oituli? Ege uiaba au geum, pako au damred; ege uiaba mer atager, kega, Nete dali, abelelam E abi detager abele uag, pako abele ni, epe uiaba abi aserei?

²⁶ Ege uiaba nerute apek tauer ge tabarki, abele Gadara le la ged, abele apek keper ge, E abkoreb Galilaia ge.

²⁷ Ege E narlam eupamada, epe sobkak obapit nerute le abele uteb, E emeretelam nagri demoni giz abi dog; ege nolea am uali kak, a nolea emeri meta ge, epe E ao ge emeri.

²⁸ Ege E abi erdali Iesu, E au kodo ereretikri, a E ekesmeri abara opem, ege E abi elele detager, kega, Kaka nako marim, Iesu Ade ra Uerem au kale? Kaka marim bali, nole kari asiassi nakeli.

²⁹ Abelelam, E abi detager, kega, Ma lamar uit teosmeda lelam. Abelelam gaire gerger E abi erpei: ege uiaba abi didbari malil par, pako lu dimili abara teter, a uiaba abi asesered; ege E

umele malil par dergeir, epe demoni giz abi ais sumez ge.

³⁰ Ege Iesu abi itimer, kega, Mara nei nako? E detaut, kega, Kara nei Legeona; abelelam gaire demoni giz kemem abi dog.

³¹ Ege uiaba abi damsare, Ma nolea detager keribi bakeauare muimui uteb.

³² Gaire borom abele gorgor paser ge erueda: ege uiaba abi damsare, kega, Debele ki nabakeauare nabarte muige borom ge. E uiabim namarida.

³³ Epe gaire demoni giz baos adem lelam, a bakeauare borom ge barot: ga baupamaret muimui uteb keper ge, ege gaire borom guni baitarare.

³⁴ Abele le giz, borom naseseredlare, erdalare abele lu E ikerer, epe uiaba au koreder bamer, a ged ge gaire uteb daratagerare.

³⁵ Ui ge tabakeauare dasmerare abele lu E ikerer; ga tabakeauare Iesuim, uiaba erdalare le demoni giz dedkoli, emetu tabaos, a E emeri Iesu teter ge, E ame, a tonar tonar: ege uiaba au geum.

³⁶ Ui ge le erdalare, a uiaba natomertare uiaba le nagri demoni giz dedkoli, emetu idgiri.

³⁷ Abele uteb Gadara ge uridili, uiaba ko abi damsare, kega, Keriba ged ma dekaer; abelelam ui au geum: ege E ko bakeamulu nar ge, E atiem.

³⁸ Le demoni dedkoli teosmeda, E abi damos abi dog emeri: epe E nolea la kak, a abi emariklu, kega,

³⁹ Bakeamu mabara ged, a mabara boai, a uiabi natomertauem abele gaire au lu Ade de marim

ikeli. Ege E bakeamulu a natomeret gaire uteb uridili, gaire au lu pe Iesu de abim ikeli.

⁴⁰ Iesu iako takomeda nerute apek, epe gaire le lakub netate utebem; abelelam abi naokailare.

⁴¹ Dasmer, nerute sunago kole tabaruk, abara nei Iairo; E Iesuim dasmer, E ekesmeri Iesu ra teter ge, abim elele bar, kega, Debele ma tabakeamu kara meta ge.

⁴² Abelelam abara neur E netat, nako abara urut tuelf, maike eumid. Ege E bakeamulu, a gaire lakub abi dirumedare.

⁴³ Nerute kosker mam gim dauer, tuelf gaire abara urut, abara lu desemulu lukup keimle naisuelare, ege abara gim nolea eseamuda,

⁴⁴ Ege bakeamulu Iesu sor ge, E itut abara am uali deg: ege abara mam gim desemulu.

⁴⁵ Epe Iesu uiabi detager, kega, Netide kari natutida? Uiaba detaut, kega, Ua? Ui ge, Peteru pako uader le, abi kemem detagerare, Opole, ege gaire le lakub mari dirumedare, nako debele ma detager, Netide kari natutida?

⁴⁶ Ege Iesu detager, kega, Nerute le lut kari natutida: abelelam kaka umele nagri adgiri karielam emetu bakeamu.

⁴⁷ Ege abele kosker E umele E nolea gumik abim, ege E bakeamulu au durdur, a abara opem E ekesmeri; E abi etomeret abele ged uridili abele lu E abi itut abelelam abara gim emetu idigiri.

⁴⁸ Epe E abi detager, kega, Kara neur, mara nerkep saserim, maba oatulam ma eded akaida maba gimlam; ma uerkab bakeamu.

⁴⁹ E mena detaut abele mer, nerute le sunago kole tabarki E sirdam, abi detager, kega, Mara neur emetu eumid; debele ma nole kole bamesili.

⁵⁰ Ege Iesu asoli abele mer, epe E abi detaut, kega, Ma nolea geum kak: ma oituli, ueakai E nagri eded.

⁵¹ Ege E balu muige meta ge, E nolea la kak nerute le abi irmili, no Peteru, pako Iakobo, pako Ioane, pako neur ra aba, pako abara apu.

⁵² Ege uiaba uridili au kase ebazoli, abi au omare: epe E detager, kega, Uaba nolea elele ebazoli; neur nolea eud kak, E uteidi.

⁵³ Ege uiaba abi neg degarare, abelelam uiaba umele E emetu eumid.

⁵⁴ Ege E uiabi adem adige, gaire le emeri muige, epe E abi erpei abara tag, E dabgeri, kega, Neur, ma ekue.

⁵⁵ Ege abara lamar ko takomed, epe E ekueilu: a E detager, kega, Debele leuer abi ikuar eroli.

⁵⁶ Epe abara aba a apu uiaba au kase damreda: ege E uiabi daisumda nolea abi etomeret nerute le, abele lu emetu ikeli.

9

¹ Ege E darabgerare abara kaimeg giz, tuelf le, ege E uiabim nakuarare abele adigiri, pako abele sirdam demoni giz uridili dituaki, pako gaire gim le giz uiabi idigiri.

² Ege E uiabi namarida ko natomertare Ade ra baselaia ge, a uiabi idigiri gaire gim le.

³ Ege E uiabim detager, kega, Uaba nole lu aisare kak abele bakeamu, nole koket kak, nole

epei kak, nole leuer kak, a nole mani kak; a nole neisi am uali ameara.

⁴ Uaba nerute meta ge badari, emeri abele, a iako bakeamu.

⁵ Uiaba le giz uabim agared kak, a nolea uabi asor kak, uaba bakeamu abele gedlam, sep ditkeda uaba teter gablam, uiabi atamelam.

⁶ Ege uiaba bakeauare, derauei gaire ged, a natomertare Ade ra debe mer, a uiabi idigiri gaire gim le uridili.

⁷ Ege Heroda opole asoli gaire lu uridili emetu ikeli: epe abara nerkep au okasosok, abelelam uader detager, kega, Ioane Bapataiso ko eded akaida eudelam;

⁸ A uader detager, kega, Elia pedali paret kak; epe uader detager, kega, Nerute perofeta emeretlam, E ko eded akaida.

⁹ Heroda detager, kega, Kaka derapeida Ioane ra kerem: nete le kaka asoli gaire mer mokakalam? E lagelag abi dasmer.

¹⁰ Ege kaimeg giz ko takomeda, uiaba abim etomertare gaire lu uiaba emetu ikeli. Epe E uiabi ais nerute uteb, nolea le kak, abele ged nei atker Bethesaida.

¹¹ Ege gaire le lakub uiaba emetu umele, a uiaba abi irmilare: ege E uiabi agiz, E uiabi detager tonar Ade ra baselaia ge, pako idigiri uader le lagelag eded.

¹² Ege maike lem baraigida; epe gaire tuelf le tabarki, a abi detager, kega, Debele ma namarida gaire le lakub, iaueakai uiaba bakeauare gaire uteb, abele kebi uteb maike, uiaba emeri, a leuer deraimer: abelelam abele uteb nolea le kak.

13 Ege E uiabi detager, kega, Uaba uiabi leuer ikuar. Ege uiaba abi detager, kega, Meriba nolea leuer kak, no faif areto a lar neisi; debele keriba ko bakeamu leuer terapei uiabim peike gaire le lakub.

14 Abelelam mokakalam faif tausan le uridili. Ege E uiabim detager, kega, abara kaimeg giz, Uaba uiabim detager debele uiaba manoro emeri, fifte le gaire nosik.

15 Ege uiaba ikerare abkoreb mokakalam abara mer, a uiabim uridili detagereda, kega, Gaire nosik uaba mamoro emeri.

16 Epe E tais faif areto a lar neisi, E kotor dimirualu, a esoao, a itur; a uiabi nakuarare, abara kaimeg giz, a uiaba naisuerare abele gaire le lakub.

17 Ege uiaba eroare, ege uiaba uridili gem osmeda; epe uiaba kaier leuer arot epei ge, ege tuelf epei osmeda, leuer mogmog.

18 E tepteb esorerapare, abara kaimeg giz uiaba okakis: epe E uiabi nautumerare, kega, Nako gaire le la mer karim nete?

19 Ege uiaba abi detautare, kega, Ioane Bapataiso; epe uader detager, kega, Elia; a uader detager, kega, Nerute perofeta emeretlam, E ko eded akaida.

20 Ege E uiabim detager, kega, Nako uaba mer karim nete? Epe Peteru abi detaut, kega, Mama Keriso Adalam.

21 Epe E uiabim daraisumdarare, kega, Nolea nerute le etomeret abele lu;

22 Kega, Abkoreb gaire lu asias Ade ra Uerem, pako aule giz abi dikaer, pako zogozogo le giz,

pako aotale giz, uiaba abi ipitare, a thri gerger ko eded.

²³ Ege E uiabim gaire le uridili detager, kega, Ese nerute le lagelag kari narmili, mamoro E tababu obogai, abara satauro bakuar gaire gerger, a kari narmili.

²⁴ Abelelam, ese nerute le lagelag abara eded asisiem, abele ko abi; ese nerute le abara eded abi karielam, abele ko ededem.

²⁵ Abelelam, ese nerute le geseb ge uridili terapei, a abara mar abi, pako adem, nalu bodomalam abim?

²⁶ Ese nerute le kari sirip ge, pako kara mer, abkoreb Le la Uerem ko abi sirip ge, E tabarki kemem gaire angela zogo, abara Aba zorom ge.

²⁷ Ageakar, kaka uabim detager, kega, Uader peike, uiaba nole eud kak, kekiam uiaba Ade ra baselaia dasmerauem.

²⁸ Ege gaire mer eseamulu, nako eit gerger, epe E abi ais Peteru, pako Ioane, pako Iakobo, ege uiaba ogi nerute tumem perepere paser ge, E esorerapare.

²⁹ E esorerapare, a abara op depegemelu, E kakekak abara ame uali, au zoromzorom.

³⁰ Dasmer, ege neisi le uiaba abi mer atagerem, Mose pako Elia;

³¹ Ui etomeret au zoromzorom, ege uiaba mer atager tonar abara eumid keubu, Ierusalem a ge.

³² Ege Peteru au uteidi pako uader abi kemem: ege uiaba ekiam, a uiaba erdalare abara au zoromzorom, pako neisi le uiaba ekue okakis.

³³ Epe ui bakeamulei, a Iesu dikaer, epe Peteru abi detager Iesuim, kega, Opole, debele meriba

emeri peike: keriba thri meta akerare; mara nerute, Mose ra nerute, a Elia ra nerute: ege E nole akiapore kak abele mer detager.

³⁴ Abele gaire mer, uiaba natkamda baz de, a uiaba ispilu: ege uiaba au geum, abele baz maike.

³⁵ Le la mer teosmeda abele bazelam, kega, Kara Uerem nasge idali: uaba abim asoli.

³⁶ Ege abele mer sobkak eseamulu, epe uiaba erdali Iesu, E tepteb. A uiaba nolea mer kak, a uiaba nolea etomeret nerute le, abele kerker, gaire lu uiaba erdalare.

³⁷ Idim ge, uiaba paserlam batueli, epe uiaba obapit gaire le lakub.

³⁸ Dasmer, nerute le ereretikri le lakublam, kega, Ereuere le ae, kaka mari damosi, ma dasmer kara uerem; abelelam kara uerem netate:

³⁹ Dasmer, ege E nagri abara gim lamar uit, epe E ereretikri, E udud, abara te ueker, E bapegiri, E nolea sobkak osmelu.

⁴⁰ Kaka damosi mara kaimég giz, uiaba dituaki osmeda adige; a uiaba nolea umer kak.

⁴¹ Ege Iesu detaut, kega, Abele nosik nolea oatur kak, pako erar, kaka uabim kemem naket gerger? pako omare uabim naket gerger? mara uerem karim tegaret.

⁴² Ege E tabakeamu, E ekesmeri, E udud, abele demoni giz, epe Iesu daisumda abele uit lamar, pako idigiri abele uerem, E ikuar abara aba.

⁴³ Ege uiaba uridili au damreda Ade ra atamelam. Epe uiaba uridili au damreda gaire lu Iesu de ikeli, epe E uiabi detager, abara kaimég giz,

44 Uaba mamoro asoli abele mer: abelelam Ade ra Uerem maike uadikuarare le la tag.

45 A uiaba nolea umer kak abele mer, ege uiaba nolea erdali, abelelam uiaba nolea asoli abele lu: ege uiaba au geum abi itimer tonar abele mer.

46 Ege uiaba asareda, nete le aule.

47 Ege Iesu opasereret abele dikiapore uiaba nerkep, epe E erpei nerute kebi uerem, E ekue maike abi dog.

48 Ege E uiabi daratagerare, kega, Ese nerute le tegared abele kebi uerem kari nei ge, ege E karim tegared: ese nerute le karim tegared, ege E tegared abele le kari namarida: abelelam E kebile ise uabim dali, E aule.

49 Ege Ioane de abi detager, kega, Opole, keriba erdali nerute le E imud demoni giz mari nei ge; epe keriba abi daisumdardar, abelelam E nolea meribi irmili.

50 Ege Iesu abi detager, kega, Uaba nolea daisumda: ese nerute le nole meribi dedkoli, E meribi okakis.

51 Ege abara kerker maike tabarki, E iako takomeda kotor ge, ege E bakeamulu Ierusalemage,

52 Ege uader ko namarkare abi kekiam: ui ge bakeauare bamer nerute uteb Samaria ge, ui abim derserare.

53 A uiaba nolea abi la kak, abelelam E bakeamulu Ierusalemage.

54 Ege neis abara kaimeg giz, Iakobo a Ioane, ui erdalei, ui detagerei, kega, Opole, nako ma lagelag ki datagerei debele ur uatabu kotorlam, ueakai ui obaum, mokakalam Elia de ikeli?

⁵⁵ A Iesu sorem egreemalu, E uiabi barditug, kega, Uaba nolea umer kak tonar muige uaba nerkep.

⁵⁶ Abelelam Ade ra Uerem tabarki nolea dedkoli le la eded, epe E tabarki ueakai gaire le eded nagri. Ui ge bakeauare nerute utebem.

⁵⁷ Ui ge bakeauare abele gab ge, ege nerute le abi detager, kega, Opole, kaka mari narmili gaire uteb ma bakeamu.

⁵⁸ Ege Iesu de abi detager, kega, Arobe nagri abara kur, pako gaire epereda ebur nagri uteb uteidi; epe Le la Uerem nolea uteb kak uteidi.

⁵⁹ Ege E detager nerute le, Ma kari narmili. Ege abim detaut, kega, Opole, ma kari nakuar kaka kekiam nabakeamulu atkobeilu kara aba.

⁶⁰ A Iesu abi detager, kega, Debele ikedi le eumida uiaba etkobei; marim abkoreb ma ekue etomeret Ade ra baselaia ge.

⁶¹ Ege nerute le abi detager, kega, Opole, kaka mari narmili; epe ma kari nakuar kaka kekiam bakeamu natomertare karbara boai.

⁶² Ege Iesu de abi detager, kega, Ese nerute le erpei abele uet abara tag, a dikaer, a ko sorem egreemalu, E nolea abkoreb Ade ra baselaia ge.

10

¹ Keubu, Opole depegeli uader sefenti, E uiabi namarida neisi a neisi le kekiam abara opem, gaire uteb uridili, E keubu.

² Ege E uiabi daratagerare, kega, Abele saito itraker au kase, neisi a neisi le uiaba dorge ikeli: debele uaba damosi Opole abara saito itraker, iaueakai gaire le namarida ikeli abara dorge.

³ Ua obakeauare: dasmer, kaka uiabi namarida mokakalam kebi mamoe giz eipu luko.

⁴ Uaba bakeauare, nolea ais mani epei, a pako epei, a teter gab: uaba nolea damareda omare le uabi obapit gab ge.

⁵ Ese uaba barot nerute meta ge, uaba kekiam meta kemle abi detager, kega, Uerkab uabim.

⁶ Ese le debele uabim, a uaba abim debele; ese nolea uabim debele, uaba ko takomeda.

⁷ A uaba emeri abele meta, eroli a ereli abele gaire lu uiaba uabim uadaisuerare: abelelam abkoreb bodomalam le dorge ikeli. Uaba nolea bakeauare nerute meta a nerute meta.

⁸ Ese uaba nerute uteb ge barot, a uiaba omare uabim, a ua eroare gaire leuer uiaba uabim derseri:

⁹ Uaba nadgirare uader gim le, a ua daratagerare, kega, Ade ra baselaia maike uabi dog.

¹⁰ Ese uaba nerute uteb ge barot, a uiaba nole uabi omare, debele ua bakeauare giz akos uteb, kega,

¹¹ Abele sep uaba uteb, ege sep batagerda keribi dog, a keriba ditkeda uabim: debele uaba umele abele lu, ege Ade ra baselaia maike uabi dog.

¹² Kaka uabi detager, kega, Abele gerger kebi bodomalam Sodomaem abele uteb ge.

¹³ Korasina ae; kaka au nasenase marim! Bethesaida ae; kaka au nasenas marim! abelelam ese ikeli Turo a Sidonaim atamelam emetu ikeli uabim, nako, emeretelam uiaba emetu obazgeda, emeri mokakalam zegerzeger uali pako tibitibi uali.

14 Kebi bodomalam Turo a Sidona abele gerger ia uabi itimer.

15 Marim Kaperenauma, uige mari uanageser-are armem, a keubu ma ekesmeri muige abele Hedisge.

16 Ese le asoli uabim, mokakalam kari asoli; ese nerute le uabi dituaki, mokakalam kari natuaki; ese nerute le kari natuaki, epe E natuaki abele le kari namarida.

17 Ui ge ko tabakomeret, abele sefenti gaire le, uiaba sererege, kega, Opole, ege demoni giz uiaba asoli keribi, mara nei ge.

18 Ege E uiabim daratagerare, kega, Kaka erdali Satana, E ekesmeri kotorlam, mokakalam perper ise.

19 Dasmer, kaka uabi ikuar abele sirdam ko tabo E sapiri pako bokani, pako saserim uridili le tekelar: nole nerute lu adud uabim.

20 Uaba nole sererege abele lu, ege demoni giz uabi asoli; debele uaba sererege abele lu, iaueakai uaba nei emetu uadetar kotor ge.

21 Peike abele hua ge, Iesu ra lag au sererege, Lamar Zogolam, kega, Kaka mari esoao, kara Aba, kotor Opole pako geseb ge, abelelam ma ispilu abele lu uader umele pako pardar, a natomertare abele lu kebi uerem ge: uao, kara Aba, abele mara lag peike.

22 Ege kara Aba gaire lu E kari naisuer: nole le ardar kak abele Uerem, epe abara Aba; nole le erdali abele Aba epe abara Uerem, pako nerute le abara Uerem E lagelage abi etomeret.

23 Ege E basker taba kaimegem, a kebi mer uiabim, Uerkab abele pone emetu erdali uader lu uaba erdada:

24 Abelelam kaka uabim detager, kega, Gaire perofeta pako opole giz, ui lagelage uardarare abele lu ua erdada, a uiaba nole ardar kak; a uiaba lagelage asoli abele lu uaba emetu asoli, a uiaba nole asor kak.

25 Dasmer, ege nerute le ekuei, ereuerem gelar giz, E abi mirem, kega, Ereuer le, nalu lu kaka ikeli ueakai kaka nagri eded niaiem niai karem?

26 Ege E abi detager, kega, Nalu detali muige abele gelar? nalu mer ma etag?

27 Ege E etkalu, kega, Ma omare Opole mara Ade, mara nerkep kemerkemer, mara mar kemerkemer, mara saserim kemerkemer, mara akiapor kemerkemer; ma omare le mai kes mari dog, mokakalam mari omare.

28 Ege E abi detager, kega, Mara mer barkak: ma ikeli abkoreb mokakalam, ueakai ma eded nagri.

29 Epe E lagelage tababu barkakem, E Iesui detager, kega, Kaka umele, na le mai kes kari dog?

30 Ege Iesu de detaut, kega, Nerute le tabakeamu Ierusalem lam Ieriko ge; ege uader lu gatkamer le giz abi erpeirare, abara ame uali digirare, a ipitare, a ui ga bakeuare, ege imereder maike eud.

31 Ege nerute zogo le, E bakeamulu abele gab ge: E abi erdar, a abielam degab etaruklu.

³² A mokakalam, nerute Leui le, E osmelu abele uteb gab ge, E bakeamulu E erdali, abielam degab etaruklu.

³³ A nerute Samaria le, E bakeamulu abele uteb gab ge: E erdar abele le emeri, E au omare abi,

³⁴ Ege E bakeamu, erep abara ziz, a lukup epaitered pako uaina; ege E agisilu ebur sor ge igimulu, E ais nerute meta, E abi asesered.

³⁵ Nerute idim ge, E meme demareredlu, ege E ikuar neisi denari meta kemleim, a abi detager, kega, Ma abi asesered; ese nerute lu E lagelage, ma terapei abi ikuar, ka iako tarakomelu, mari bodomalam.

³⁶ Uiabelam neis netate le, nete le mai kes darali abim nerute le lu gatkamer le giz erepeidarda?

³⁷ Ege abim detaut, kega, Le abi omare. Ege Iesu de abi detager, kega, Ma ko bakeam mokakalam ikeroa.

³⁸ Ui ge bakeuare, ege bakeamulu nerute uteb: nerute kosker, abara nei Maretha, E tegaredlu Iesu tabara meta.

³⁹ Tabara berbet, nei atker Maria, ege emereder maike Iesui teter ge, E lagelage uaeasor Iesu ra mer.

⁴⁰ Ege Maretha de sagim deger taba boaiem; ege E ekueilu, a abi detager, kega, Opole, nalu, ma nole kari dikiapore, epe kari le lut nakuar peike tepteb derser gaire lu? ma ge abi detager, kari upinati.

⁴¹ Ege Iesu de abi detager, kega, Maretha, Maretha, ma lu lag gesebge, no pama geseb lu dikiapoare:

⁴² Nerute lu pe debele; ege Maria de dikiapore debe lu, nole nerute le abielam ais.

11

¹ Iesu emri nerute uteb ge, ege E esorerapare, eseemuda, ege nerute abara kaimeg giz, E abi detager, kega, Opole, debele ma keribi dereuerare abele esorerapare, mokakalam Ioane de tabara kaimeg giz nereuerare.

² Ege E uiabi detager, kega, Ua esorerapauem mokakalam, kega, Keriba Aba kotor ge, zogoem mara nei. Mamoro mara baselaia sepem uatabu. Ikeroa mabara lag abele geseb ge, mokakalam kotor ge.

³ Keribi ikuar leuer, nerute gerger a nerute gerger, keribi abkoreb.

⁴ Adem dikri keriba uit; abelelam keribibu dikri ui uridili keribi dedkoeda. Nole keriba tegeredare abele mirem, epe keribi ditkedarare uitelam.

⁵ E ge uiabi nautumerare, kega, Nete uaba tebud, E bakeamulu eipu ki ge, E abi detager, kega, A ma tais neisi netat areto, keubu iako bodomalam;

⁶ Abelelam, kara tebud emetu tabakeam, a kaka nole leuer kak abi ikuar;

⁷ E ge abi detager, muige taba meta ge, Nalu ma kari naogatili: emetu peike meta dimiredare, emetu ki eididare omaskerkem; kaka umer kak nakiamlu mari nakuare?

⁸ Kaka uabi detager, kega, Ese E nole ekue abi ikuar, abelelam abara tebud, epe E ikuar gaire lu uridili E laglag, abelelam E elele damosi.

⁹ Kaka uabi detager, kega, Debele uaba damos, ueakai uaba nagri; uaba deraimer, ueakai nagri; uaba mudmud, E uabi diski.

¹⁰ Abelelam, ese le abi damos, E nagri; le deraimer, a erdali; le mudmud, E abi diski.

¹¹ Ese uerem areto damos tabara abalam, nako E abi baker ikuar? Ese abi damos nerute lar, nako E ikuar tabo, a nolea lar kar ikuar?

¹² Ese abi damos kalkal ra uer, nako E ikuar bokani, a nolea ikuar kalkal uer?

¹³ Uaba adud tonar, ese uaba umele gaire debe lu naisuerare uaba omasker, mokakalam uaba Aba, emeri Kotor ge, E uabi uadekuarare Lamar Zogo uaba damos?

¹⁴ E imud nerute demoni, ege E te dabimdabim. Ege demoni baos abielam, ege E mer etkalu, abele le te dabimdabim; ui ge gaire le giz abi damerare.

¹⁵ Uader le batagelare, kega, Bezebul, demoni giz opole, abelelam E umeli demoni imud.

¹⁶ Uader le giz abi mirem, ege uiaba abi deraimerare atamelam kotorlam.

¹⁷ Ege E opasereret uiaba dikiaporare, E uiabi daratagerare, kega, Gaire baselaia uridili epuli eseamuda; pako boai epuli nolea niaiem ekue.

¹⁸ Ese Satana tababu barili a epuli, nako E umele niaiem ekue, pako abara baselaia? abelelam, pe ua detager, kega, Bezebul, abelelam ka demoni imuda.

¹⁹ Ese kaka namuare demoni Bezebuloelam, netide uanamuare demoni giz a uaba omasker giz? abelelam keubu gerger ge, uabi uaditimerare.

²⁰ Ese Ade ra tag kaka imud demoni giz, ege Ade ra baselaia emetu tabaruka.

²¹ Ese saserim le nagri ares lu taba meta uanaseseredauem, ia atko kak lu uadaragiri:

²² Ese au saserim le uatabakeamu abi uaekesmer, abara ares lu uadais, E au oituli tabara ares lu.

²³ Ese nerute le nolea kari la kak, E nolea kari kemem; ese nerute le nole etami kari dog okakis, E tabara lu derapei.

²⁴ Ese lamar uit obaos lelam, E degemli uatuet uteb, ege E deraimer nerezı uteb; nolea uteb kak, ege E detager, kega, Kai ko tarakomelu karba meta, emeret kaka emeri.

²⁵ E bakeamulu taba utebem ge, erdar emetu dirup esemulu.

²⁶ Ege E bakeamulu, taraisare uader sefen lamar, ui au adud abi tumge; a bakeuare barot muige, a bamer: ege E au adud abele le la mop, abele gerger ge ditimedelu.

²⁷ E detager abele lu, ege nerute kosker ge, E ereretikri, eipu le lakub, a abi detager, kega, Uerkab ma E osmeda abele kemlam, pako abele nano ma ereli.

²⁸ E abi detager, kega, Ageakar, E uerkab abele le asoli Ade ra mer, E asesereda.

²⁹ Ege gaire le lakub abim tabakeuare, ege E uiabi daratagerare, kega, Abele nosik au adud; uiaba deraimerare atamelam; a nolea atamelam kak, no abele atamelam Iona perofeta tepteb.

³⁰ Abelelam, mokakalam Iona abele atamelam Nineua ge, abkoreb Ade ra Uerem abele nosik.

³¹ Abele kosker, opole ziai apek, E ekue okakis nosik le ge, abuar ge E uiabi nautumerare, a

uiabi bodomalam: abelelam E tabakeam bazmirare ge, E lagelage uasiri Solomona ra pardale; dasmer, ike abele nerute le, E au kale tumem Solomona.

³² Ui ge bako Nineua ge, abele gerger ge uanautumerare abele nosik, E uiabi bodomalam: abelelam uiaba obazgeda Iona ra marau; dasmer, ike abele nerute le au kale tumem Iona.

³³ Nolea le emetu disirik lamepa, E ikedilu lokod ge, pako agud saito ge, E ikedi tumge, iaueakai uadatki gaire le emeri be ge.

³⁴ Pone lamepa ra gem: ese mara pone debele, mara gem uridili nagri datki; ese mara pone adud, a mara gem nolea datki kak.

³⁵ Marim, nole kupkupi datki muige mari dog.

³⁶ Ese mara gem uridili nagri datki, nole kupkupi kak, E datki uridili, mokakalam lamepa datki mari dog, au bebe.

³⁷ Ege E detaut, nerute Faresaio de abi detager, kega, Kari okakis ereueda: Ege E balu, E emerilu ero.

³⁸ Ege Faresaio de abi erdar, ege E damerar, abelelam E no eroli, nole tag ogarup kak.

³⁹ Ege Opole abi detager, kega, Uaba Faresaio uaba dirup abele tanelu ge pako abele kumeti; epe muige pe mitkar poipi a adud tonar.

⁴⁰ Uaba paim paim! Le ikeli sor ge, pako muige?

⁴¹ Debele ua aisare uaba lu omare; dasmer, gaire lu uridili uaba ogdirup.

⁴² Uaiiai uaba Faresaio giz! abelelam ua aiseda ten mili, pako pekano, pako gaire lu uridili nagri nur ge, a ua dekaerta Ade ra itimer, pako abara

omare: abkoreb ikeli abele lu, a nole dikaer abele lu.

⁴³ Uaiiai uaba Faresaio giz! abelelam ua au lagelag bao aule sunago ge, pako omare gizakos uteb.

⁴⁴ Uaiiai uaba aotale pako Faresaio, ua bes le giz! abelelam uaba mokakalam ao giz espi, ese le tumem uadegemeli, umer kak.

⁴⁵ Epe nerute gelar giz, ereuer le, E abi detager, kega, Ereuer le, mama keribi dedkoeda, mara mer peike keribim.

⁴⁶ Ege E daratagerare, kega, Uaiiai uaba gelar giz ko! abelelam uaba nole dekmerik uaba lu uaba no ikuar nerute le, uaba tag pem nole.

⁴⁷ Uaiiai uaba! abelelam uaba ao emorare perofeta, a uaba kaied giz a uiabi ipit.

⁴⁸ Epe uaba etomeret tonar uaba kaied giz, pako sererege: abelelam uiaba ipit, a uaba emorare uiaba ao.

⁴⁹ Ege Ade ra pardali detaut, Kaka uiabi namarida perofeta pako aposetola giz; uiaba uader ipit a uader damrik;

⁵⁰ Iaueakai abele nosik deraimer gaire perofeta ra mam, babused abele kerker ge ditimedelu geseb ge;

⁵¹ A ditimed Abela ra mam bakedida Sakaria ra mam, uiaba ipit eipu neres ge, maike Zogo meta: ageakar, kaka uabi detagereda, kega, E deraimerare abele nosik.

⁵² Uaiiai uaba gelar giz, ereuer le! abelelam ua aisare ki pardar: ua nole barot, a ua daisumda uader lagelag barot.

⁵³ Ege abele mer E uiabi detager, uiaba aotale a Faresaio giz au ueku; uige abi mirem itimerare gaire lu gem;

⁵⁴ A ui ge deraimerare abara merem E ua detaut, a ui ge natomertare.

12

¹ Ege gaire le lakub tabakeuare netat uteb ge etami, ege E ditimeda uiabi marao, tabara kaimeg giz, kega, Uaba dekaer Faresaio ra lu erperida, uiaba bes.

² Abelelam nole lu ispilu, E natomertare: nole lu gumik, E natomertare.

³ Ege gaire lu uridili kupkupi ge ua detautare, E detomertare datki; uader lu pe ua kebi mer lu muige uteb ge, E natomertare tumem meta.

⁴ Kaka uabi detagereda, kabara tebud, Ua nolea geum uiaba no gem ipit, ese uaeseemu, iauaekai umer kak ko ikeli nerute lu.

⁵ Epe kaka uabi detomeret le uabi geum: Uaba abi geum, ese uaeseemu abi ua ipit, E sirdam iako batauered gena: ageakar, kaka uabi detagereda, kega, Uaba abi geum.

⁶ Uaba nolea bodomalam faif kebi ebur giz epereda neisi asari? Ade nole nerute ebur okataprik kak abara op.

⁷ A uaba mus uridili emetu etag, abelelam uaba nolea geum, uaba aule gaire kebi ebur.

⁸ Kaka uabi detagereda, kega, Ese nerute le lut kara nei uanatomertare gaire le, Ade ra Uerem ko etomeret abara nei opem Ade ra angela.

⁹ Ese nerute le kari asared le ra op uridili, E ko asared opem Ade ra angela.

¹⁰ Ese nerute le adud mer Ade ra Uerem, E itikir: ese nerute le adud mer Lamar Zogo, E nolea itikir.

¹¹ Ese uaba eguatumur sunagoem, a opole, a tarim le, ua geum kak mer detautauem, nako ia detautare:

¹² Abelegelam Lamar Zogo de uabi uaderuer-are, abkoreb ia mer detautare.

¹³ Ege nerute le kublam, abi detager, kega, Ereuer le, ma kara le detager, E uateragoa tabara sirdam lu karim.

¹⁴ Ege E abi detager, kega, oe, netede kari nakuar abele sirdam uabim?

¹⁵ Ege E uiabi daratagerare, kega, Ua asesered uaba nolea geseb lu lag: abelelam nolea le eded geseb lulam.

¹⁶ Ege E uiabi daratagerare, nerute mer babis-darie, kega, Nerute le abara lu abi seb ge au turum turum:

¹⁷ E dikiapor, kega, Nalu lu ka akere, epe nolea pe kes kak, karbara lu aodage?

¹⁸ E detager, kega, Abele lu ka ikeli: kaka adem erapei karbara saido meta, kai ko au kale akailu; kaka etami okakis karbara turum, pako gaire debe lu uridili.

¹⁹ A kaka abi detager, karbara lamar, kega, Kara lamar, ege marim gaire debe lu, E ikeli abkoreb dordor urut, ueakai ma mamoro emeri gaire urut ge, a eroli, a erer, a iako sererege.

²⁰ Ege Ade de abi detager, kega, Ma paim le, mara iako lamar ki ge tais; netede ia ueais gaire mara lu ma derseri?

²¹ Mokakalam le etami gaire lu, tabara lu, a nolea lu nagri Adalam.

²² Ege E uiabi daratagerare, tabara kaimég giz, kega, Abelelam kaka uabi detagereda, kega, Uaba nole au kase dikiapor uaba eded, na leuer uaba eroare; gako uaba gem, na lu uaba amearé.

²³ Ege eded aule leuer aroem, pako gem aule am ualilam.

²⁴ Uaba dikiapor oreua, uiaba nolea saido dikri, a nolea saido itraker; a uiaba nolea uteb kak, a nolea saido meta kak; ege Ade de uiabi darasisiare: uaba au debele ebur giz!

²⁵ Nete uabelam umele ikeli dikiapor, au kale perper abara eded netat kubita?

²⁶ Ese uaba umer kak ikeli kebi lu, nalugelam pe ua au kase dikiapor uader lu?

²⁷ Uaba dikiapor dap, nako tonar omeili: uiaba nolea dorge kak, nolea erat; kaka uabi detager, Solomona nolea am uali pako debele, nolea mokakalam uader lu debele.

²⁸ Ese Ade de ikeli mokakalam sumez am uali, abele gerger omeilu, iauaekai obatauered urem; nako au am uali uaba kebi oituli?

²⁹ Uaba nolea deraimerare, nalu ia eroare, nalu ia ereare; uaba nerkep nolea dikiapor gaire lu.

³⁰ Abelelam gaire lu uridili gaire ged geseb ge deraimerare: epe uaba Aba E umele gaire lu abkoreb uabim.

³¹ Debele ua mamoro deraimerare tabara base-laia, ueakai keubu gaire debe lu uaba nagri.

³² Uaba nolea geum kak kebi mamoe giz; abelelam uaba Aba E lagelag uabi ikuar abele baselaia.

³³ Debele uaba lu bodomalam, ueakai uabi ikuar; ueakai uaba nagri debe epei, kotor lu

nolea eseamur kak, nolea maike eruam le, a nolea degem aro kak.

³⁴ Abelelam abele uteb ge pe uaba lu nagri, uaba nerkep pe ko kemem.

³⁵ Uaba dimiri uak ge, a uaba lamepa disirik;

³⁶ Debele ua ikerauem abkoreb uader le dekaili uiaba opole, E ko takomer uetpurem; iaueakai ese E tabakeam a ipit abele gab te, uiaba sobkak diski.

³⁷ Abele memeg le giz uiaba uerkab, uiaba opole E erdali uiaba ikeli abkoreb mokakalam, a mamoro derser: Ageakar, kaka uabi detager, E abara uali dimiri, a uiabi detager, Meriba ero, E bakeamu uiaba memeg le.

³⁸ Ese E tabakeamu eip ki, nako kimiar faul ereretikri, ese erdali uiaba ikeli mokakalam, uerkab uiaba memeg le giz.

³⁹ Debele uaba umele abele lu, ese lu kemle E umele abele eruam le uatabaruk, E mamoro asesered, a nolea dikaer uiaba eruam tabara meta.

⁴⁰ Abele lu ua derser: abelelam abele gerger ua nolea akiapor kak, Ade ra Uerem tabarki.

⁴¹ Ege Peteru abi detager, kega, Opole, ege ma detager keribim abele mer babisdarie, nako le uridili?

⁴² Ege Opole detager, kega, Nete memeg le sirdamu, ege E ageakar dikiapor, ege abara opole E ikuar abele sirdam abara memeg le, E uiabi ikuar leuer abkoreb abuar ge?

⁴³ Abele memeg le E uerkab abara opole tabaruk a abi erdali, ege abara dorge mamoro ikerer.

⁴⁴ Ageakar, kaka uabi detager, E ikuar abele dorge E sirdam abara lu uridili.

⁴⁵ Ese abele memeg le E dikiapor muige taba nerkep ge, Kara opole au uapum; ege E ipit uader memeg kimiar, pako uader memeg kosker, E ero, a ere, E paimpaim;

⁴⁶ Abele opole tabaruk abele gerger ge abara memeg le nole arser kak, abele mog gerger E nole ardar kak, ege E au dulam, ege E tedais abara dorge okakis uader nole asor kak.

⁴⁷ Abele memeg le umele opole dikiapor, a nole arser kak, nole ikeli gaire lu taba akiaporlam, E au damarik;

⁴⁸ Ese memeg le nole umer kak, ege E ikerer uader lu abkoreb damarik, E no kebi kebi damarik. Abelelam ese le ikuar gaire lu, E ko itimer gaire lu: Ege E gaire lu E asesereder, ui ge abi detagerare, Ma tais gaire lu.

⁴⁹ Kai tarabarki nabataueredelu abele ur gesepem: nalu lu kaka ko lagelag ese emetu dasiriklu?

⁵⁰ Karbara bapataiso kaka bapataiso; kaka au asias mop ge bakedida!

⁵¹ Nako uaba dikiapor kaka tarabarki dakuarare abele mapodan geseb ge? Kaka uabi detager, nole: epe mer bamsili:

⁵² Abelelam ditimed peirdi, faif le uiaba netat meta emeri, uiaba mer bamsili, neisi netat le neisi le mer daramesilare, a neisi le neis netat le mokakalam.

⁵³ Abib ueremei mer bamesilei, aba a uerem; apu a neur; kimiar ra apu uerem ra kosker; kosker kimiar ra apu.

⁵⁴ Ege E uiabi daratagerare, gaire le lakub, Ese ua erdarare baz omeili koki peik, ua ge detager, Nako, irmer; epe ageakar.

⁵⁵ Ese uag uami ziai peik, a ua ge detagerauem, Nako, au gerger: epe ageakar.

⁵⁶ Uaba bes le giz, ege uaba umele dikiapor tonar kotor a gesep; nalu atamelam uaba umer kak etag tonar abele urut?

⁵⁷ Nalu uaba nolea dikiapor barkak lu?

⁵⁸ Ese ma okakis bakeam nerute le, nagri abara lu mari dog, nole bodom kak, ma debe mer abim abele gab; ueakai nole mari eguatumur autmorem, le itimer mari uanakuar memeg le, ia memeg le mari uanakuar au dubar meta.

⁵⁹ Kaka mari detager, Ma nole ko eosmeda, kekiam mani aisuer.

13

¹ Abele kerker uader tabakeuare, uiaba abi etomertare Galilaia le, abelelam Pilato asesered uiaba mam, pako mam tababu baotiare.

² Ege E de uiabi daratagerare, kega, Nako, uaba dikiapor epe au uit Galilaia le uridili, ueakai uiaba au sagim gaire lu abkoreb?

³ Kaka uabi detagereda, Nolea: ese uaba nole obazgeda, abkoreb uaba uridili baum.

⁴ Uader eitin le, E erapei uiabi tumge abele kar Seloam ge, ege ui baum, nako, aule uiaba uit le uridili emeri Ierusalem ge?

⁵ Kaka uabi detagerare, Nolea: ese uaba nole obazgeda, abkoreb uaba uridili baum.

⁶ Ege E uiabi detager, abele mer babisdarie, Nerute le E nagri suke, ege E emor abara uina

gedub ge; ege E bakeamulu deraimer turum, a nole erdali.

⁷ Epe E abi detager, le dorge uina gedub, Dasmer, neis netat urut kaka tarabarki daraimer turum abele suke, kaka nole turum ardar kak: debele ismi; epe nalu dedkoli abele sep?

⁸ Ege E abi detaut, kega, Opole, debele no dikaer abele urutem, kaka giz daiue uaderauei, a gaire poipi:

⁹ Ese turum uanagri, debele; iako nole, keubu debele ma ismi.

¹⁰ Ege E uiabi ereuerem nerute sunago, sabath ge.

¹¹ Dasmer, nerute kosker nagri lamar E gebgeb, abara urut eitin; epe E no ersedi, umer kak mamoro ekuei.

¹² Ege Iesu de abi dasmer, ege E abi dabgeri, kega, Oe, epe mara gebgeb emetu eseamud.

¹³ Ege abara tag abi dog dikmerik: ege E barkak ekueilu, ege E Ade desper.

¹⁴ Epe nerute le, E sirdam abele sunago, E au ueku abelelam Iesu idigir sabath ge, ege E uiabi daratagerare, gaire le lakub, Debele sikis gerger dorge ikeli: abkoreb uaba tabakeuare idigir, sabath nole.

¹⁵ Ege Opole de abi detager, kega, Ma bes le, epe uaba nerute le sabath ge detuemer abara kau pako abara asina kau metalam, naogatare ni namerare.

¹⁶ Abele kosker, Aberahama ra neur, ege Satana de didibar, dasmer, abara urut eitn, nako nole abkoreb detuemer abara mukub sabath gerger ge?

17 Ege E abele mer detager, epe uiaba uridili au ueku abim, sirip nagri: ege gaire le lakub uridili uiaba sererege abelelam gaire au lu E ikeli.

18 Ege E detager, kega, Ade ra baselaia, nalu lu abkoreb? nalu lu kaka detaut mokakalam?

19 E mokakalam sinapi ra kep, nerute le ais, E bataueret tabara gedub ge; ege E omeilu, keubu au kale; epe gaire ebur giz epereda tam ge uteid.

20 Ege E ko detager, Ade ra baselaia, nalu lu mokakalam?

21 E mokakalam lu sik epiti, nerute kosker ais ikedi muige abele falaua neis netat mitkarem, a keubu uadarabuerare uridili.

22 Ege E bakeamulu uteb a kebi uteb giz, ege E ereuerem, a bakeamulu Ierusalem ge.

23 Ege nerute le lut, abi detager, kega, Opole nako no neis a neis le eded nagri? Ege E uiabim daratagerare,

24 Uaba saserim ueakai uaba barot kebi te ge: abelelam kaka uabi detager, uader deraimer lagelag barot, a nole umer kak.

25 Ese eseamud meta kemle ekuei, a dimi abele gab te, a uaba ekuei adige, gab te ipit, kega, Opole, Opole, keribim disk; E detaut, kega, Kaka nole umer kak uaba nagelam;

26 Epe uaba ditimeda detaut, kega, Keriba eroli a ereli mari op ge, ma ereuerem keriba gab giz;

27 Ege E uiabi daratagerare, kega, Kaka nole umer kak uaba nagelam; ua karielam bakeauare, ua uridili adud tonar.

28 Uaba au ezoli tereg ikupamaretlare, ese uaba erdali Aberahama, pako Isaka, pako

Iakobo, pako gaire perofeta uridili Ade ra baselaia ge, a uaba adem dikri.

²⁹ Ui ge tabakeauare sager pekem, pako koki pekem, pako ziai pekem, pako naiger pekem, ui bamer eroare Ade ra baselaia ge.

³⁰ Dasmer, uader keubu ko kekiam, uader kekiam ko keubu.

³¹ Abele gerger ge, uader Faresaio tabakeauare, uiaba abi detagerare, Ma adem bakeam: abelelam Heroda E lagelag mari ipit.

³² Ege E uiabi daratagerare, Ua bakeauare, abi detager, abele arobe, Dasmer, kaka demoni adem namuda, a kaka nadgereda gim le abele gerger, pako idim ge, a nerute gerger kaka ikeli eseamuda.

³³ Abkoreb kaka nagemeli abele gerger, pako idim ge, pako nerute gerger: abelelam umer kak nerute perofeta uaeumi nerute uteb, no Ierusalem ge.

³⁴ Ierusalem ae, Ierusalem, uaba ipit perofeta, pako uaba bakeru narborida uader uabim namarida! kaka lagelag natameare mabara omasker, mokakalam apu faul derap tabara uerem, a uaba nole la kak.

³⁵ Dasmer, uaba meta dikaer dedkoli; ageakar, kaka Uabi detager, Uaba nole kari umer kak, keubu gerger uaba detautare, kega, Uerkab abele le tabaruk Opole nei ge.

14

¹ Ege nerute sabath baruk, E bakeamulu nerute kole ra meta, Faresaio le, E lagelag ero, uiaba abi deraimer.

² Dasmer, nerute le abi opem, begur gim.

³ Ege Iesu de uabi daratagerare, gaire Ereuer gelar giz pako Faresaio giz, kega, Nako abkoreb idigiri gim sabath ge, nako nolea?

⁴ Ege uiaba mer baomare. Ege E abi erpei, a abi idigiri, E emariklu.

⁵ Ege E uiabi daratagerare, kega, Na le nagri asina a kau ege ekesmer auak ge, nako nole sabath ge deguar?

⁶ Uiaba nole abi mer atuak kak abele lu.

⁷ Ege E uiabi daratagerare nerute mer babis-darie uader namarida, E uiabi umele E dikiapor au lu E eidi; ege E uiabi daratagerare, kega,

⁸ Ese nerute le mari uanatager, kega, Bakeamu uetpurem, ma nole eidi au lu ge: nole nerute aule mari namarida.

⁹ Ege emariklu le bakeamulu uabim, E mari detager, Ekemer pako abele kole: ege ma bakeamulu kebi lu sirip ge.

¹⁰ Mokakalam mari namarida, ma kabeamu eidi kebi lu ge; iaueakai le namarid mari uanatager, kega, Tabakeamu, oe, ueakai ma bakeamu au kalu: iaueakai ma nagri zorom uiabi opem, uader eidi okakis mari dog.

¹¹ Abelelam, ese nerute le tababu bakai aule, E kebile; ese nerute le tababu bakai kebile, E aule.

¹² Ege E abi detager, le abi namarida, Ese ma derser uetpurem, pako leuer aroem, ma nolea tebudem mer tigri, pako leem mara boai, pako luglug le maike mari dog; iaueakai uiaba ko mari mer tigri, mari bodomalam.

13 Ese ma derser uetpurem, ma mer tigri uiabim gaire le lu kak, pako atkurit atkurit, pako pone sadamer:

14 Iaueakai ma uerkab; abelelam uiaba umer kak mari bodomalam: ia mari bodomalam keubu gerger, gaire le oituli ko obako.

15 Nerute le emeri okakis eroli, ege E asoli gaire lu, epe E abi detager, kega, Uerkab abele le leuer eroli Ade ra baselaia ge.

16 Ege E abi detager, kega, Nerute le de derseri au uetpur; E mer tigri gaire leem:

17 Ege abele uetpur gerger baruk, E namariklu abara memeg le uiabim uader namarkare, kega, Ua tabakeuare; abelelam gaire lu uridili emetu derser.

18 Epe uiaba mer batager, ui ge netate dikiapore. Ege nerute le lut abi detager, kega, Kai sep arapeilu, abkoreb kaka nabakeamulu dasmer: debele ma kari namarik.

19 Ege nerute le lut detager, kega, Kaka tais faif kau abele kaulam, kaka bakeamu, iaueakai kaka uiabi mirem: debele ma kari namarik.

20 Ege nerute le detager, kega, Kaka nagri kosker, abelelam kaka umer kak bakeamulu.

21 Ege abele memeg le tabakeamu, E abi detager, tabara opole, abele gaire lu. Le giz abele boai au urker, ege tabara memeg le detager, Ma dudum bakeamu mager gabem abele uteb ge, ma taraisauem gaire le nolea lu kak, pako atkurit atkurit le, pako gaire sadamer le.

22 Ege memeg le lut abi detager, kega, Opole, ege emetu ge esemulu gaire lu ge ma natomeret, epe abele meta nole le kak.

²³ Ege abele opole de abele memeg le detager, kega, Ma bakeamulu au gabem, a asakirik, ma uiaba elele daratagerauem ko tabakeamu, iaueakai kara meta mitkar.

²⁴ Abelegelam kaka uabi detagereda, nole nerute le uiabim mer tigri, eroli kara uetpur ge.

²⁵ Ege E okakis gaire lekub ge bakeamulu: ege egreemalu, a uiabi daratagerare,

²⁶ Ese nerute le karim tabakeamu, a nole derara tabara aba, a apu, a kosker, a omasker giz, a boai giz, a berbet giz, pako tabara eded, umer kak E dali kara kaimeg kar.

²⁷ Ese nerute le nole tabara satauro ais, a nole kari narmili, nole abkoreb kara kaimeg kar.

²⁸ Na le lagelag baker kar ikeli? Debele emeri a dikiapor naket mani bodomalam nako abkoreb iaueakai ikeli eseemuda.

²⁹ Ueakai uiaba abi neg degarare, abelelam E giz ikeli, nole aseamur kak,

³⁰ Uiaba detager, kega, Abele le E ditimeda ikeli, a nole aseamur kak.

³¹ Na opole E lagelag ares nerute opole? Debele emeri a dikiapore nako umele ares abara le ten thausan, epe nerute le tabakeamu aresem, E nagri tuenti thausan le.

³² Ese umer kak ares, debele nerute le emarik, abelelam E muriz ge, E daisumuda nole ares.

³³ Mokakalam abele le nole abkoreb kara kaimeg, ese E nole adem gaire lu uridili.

³⁴ Sol debe lu: ese nole kurabkurab, nako uaba iako kurabem?

³⁵ Nolea abkoreb sep ge, a nole abkoreb gaire poipi lu giz ge: epe adem bataueret. Ese le nagri grip, debele asoli.

15

¹ Ege telona uridili pako uit le, uiaba tabakeauare abim, uiaba lagelag asoli.

² Epe Faresaio giz a aotale giz, uiaba mudi mer, kega, Abele le E kemem uit giz, epe uiaba ereueda okakis.

³ Ege E uiabi daratagerare nerute mer babisdarie, kega,

⁴ Nete uaba le nagri mamoe netate handed, ese nerute mamoe obadimirik, ikedi nainte nain sumez ge, E bakeamu deraimer mamoe badimirida, E lagelag uaerdar?

⁵ Ese E uaerdar, E uatekapsi, a sererege.

⁶ Ese abi boai giz uaerdarare, ege abara debud a maike le uiaba etami okakis, ege E uiabi daratagerare, kega, Debele meriba sererege, abelelam kaka ko erdali kara mamoe ge badimirida.

⁷ Kaka uabi detager, kega, Mokakalam gaire le kotor ge au sererege le uit a emetu obazgeda, a kebi kebi sererege nainte nain le giz barkak nole dikiapor obazgeda.

⁸ Nete kosker nagri ten mani, ese nerute mani badimirida, E lamepa disirik, meta ge poipi ame, elele deraimer E lagelag uaerdar?

⁹ Ese uaerdar, E darabgeri abara debud pako maikle giz, kega, Debele meriba sererege, abelelam kaka erdali abele mani badimirida.

¹⁰ Kaka uabi detager, kega, Mokakalam Ade ra angela kotor ge sererege, le uit a emetu obazgeda.

¹¹ Ege E uiabi daratagerare, Nerute le neisi abara uerem:

¹² Ege keimer tabara aba detager, kega, Baba, ma kari nakuar kara lu. Ege abara lu erag uiabi naisuer.

¹³ Ege uader gerger basemerare, ege keimered tabara lu etami okakis, ege bakeamulu nerute muriz gedim; E no adud tonar.

¹⁴ Ege abara lu esemulu, abele ged uererege; ege nole leuer kak.

¹⁵ E bakeamulu emeri nerute le erdar abele ged ge; E abi emariklu abele utebem borom asisiem.

¹⁶ E au lagelag borom ra poipi leuer, iaueakai abara gem osmeda: nole le abi lu ikuar.

¹⁷ Ege E umele ge akailu, kega, kara Aba ra gaire memeg le, uiaba kaier areto gaire, a kaka uererege, mop ge eud!

¹⁸ Debele kaka nakueilu nabakeamulu karbara abem, a abi detager, Baba, kaka uit Le emeri kotor ge, pako mara opem:

¹⁹ Nole abkoreb kaka mara uerem: debele kaka mokakalam nerute mara memeg le.

²⁰ E ekueilu bakeamulu tabara aba. Ege abi abet muriz ge erdali, epe E au nasenas, E au koreder, a abi erpei, a eskos.

²¹ A ueremet abi detager, Baba, kaka emetu uit Le emeri kotor ge, pako mara opem: nole abkoreb kaka mara uerem.

²² Ege abet tabara memeg le giz daratagerare, kega, Debele tais perper am uali, debele ame; a ring ame abara tag, a teter gab ame:

²³ Debele tais kebi kau toertoer, ipit abele, mi aroare, a sererege:

²⁴ Abelelam kara uerem peike, E eumida, a ko eded akaida; E badimirida, a ko erdali. Ege uiaba sererege.

²⁵ Abara narbet uerem emeri sumez ge: E tabakeamulu maike uiaba meta ge, ege asoli uiaba uarup erem, a uedakiriare.

²⁶ A E dabgeri nerute memeg le, a abi itimer, kega, Nalu pe ua ikereda?

²⁷ Ege E abi detager, kega, Mara le tabakeamuda; epe mara abet ipit kebi kau au toertoer, abelelam E ko erdali E nagri eded.

²⁸ Epe E au ueku, umer kak bao meta ge: abara aba E osemelu adige, E abi okadersemer.

²⁹ Ege E abi detager, abara aba, kega, Dasmer, gaire urut kaka mara memeg le, gaire mara mer kaka nole batauered: ma nole kari ikuar kebi nani, ki sererege debudkem:

³⁰ Ege mara uerem peike, dedkoli mara lu okakis adud kosker, E tabakeamuda, ma pe ipit kebi kau abim.

³¹ Ege E abi detager, Kara uerem, mi emeri okakis, kara lu uridili, marim.

³² Ege abkoreb mi sererege: abelelam mara le pedali, E eumida, a ko eded akaida; E badimirida, a ko erdali.

16

¹ Ege E tabara kaimeg giz daratagerare, Nerute lu giz, E nagri memeg le, E sirdam; Ege E abi etomelu, E dedkoli abara lu.

² Ege E abi dabger, kega, Nalu lu kaka mari asoli? ma natomer abele lu ma sirdameri; abelelam kaka umer kak ma memeg le sirdam.

³ Abele memeg le lut E dikiapor muige abara nerkep ge, Nalu lu ka akerer; abelelam kara opole E kari adem abele dorgelam memeg le sirdamelam? Kaka umer kak daiue; kaka sirip damosi.

⁴ Kaka umele abele lu kaka ikeli, iaueakai ese E kari adem abele dorgelam, a uiaba ko kari nagared uiaba utebem.

⁵ Ege E mer tigri nerute leem, a nerute leem, uiaba uridili nagri lu uiaba opole; E nerute le detager, Naket lu mari dog kara opole la?

⁶ E abi detager, kega, Paita uakaisu netate handed. Ege E abi detager, kega, Ma erpei mabara jauali, ma dudum emeri, ma detar fifite.

⁷ Ege E nerute le detager, Naket lu mari dog? E detaut, kega, Saito kori netate handed. Ege E abi detager, Ma erpei mara jauali, ma detar eiti.

⁸ Ege abara opole desperer abele memeg le, abara tonar nole barkak, abelelam E au pardar: abelelam geseb le E aule dikiapor uiaba nosik tumem datki le.

⁹ Kaka uabi detagereda, Abele mamona nole barkak tonar uabim, iaueakai uaba tebud keubu uabi tegaret uiaba meta niai karem.

¹⁰ Ese le ageakar kebi lu, E ko ageakar au lu: Ese le nole barkak tonar kebi lu, E ko nolea barkak tonar au lu.

¹¹ Ese uaba nole ageakar, abele mamona nole barkak tonar, nete le uabi ikuar abele lu giz kar asesered?

¹² Ese uaba nole ageakar subele la lu, nete le uabi ikuar uaba lu?

¹³ Memeg le umer kak dorge ikeli uiabim neisi opole: abelelam E derar nerute le, E omare

nerute le; epe nerute, E maike nerute le, a dituaki nerute le. Uaba umer kak Ade ra memeg le, pako mamona.

¹⁴ Ege Faresaio giz aserare gaire lu uridili, uiaba lu lag; a uiaba abi negneg.

¹⁵ E uiabi daratagerare, kega, Uaba tonar no bes barkak le la opem; epe Ade umele dikiapore uaba nerkep: abelelam ese debe lu le la opem, E adud Ade ra opem.

¹⁶ Abele gelar giz pako perofeta bakedida Ioane: ditimedelu natomertare Ade ra baselaia ge, a gaire le batumu.

¹⁷ Kotor a gesep sobkak uaeseamu, Ade ra gelar giz nolea nerute mog uar uaeseamu.

¹⁸ Ese nerute le dituak abara kosker, a isipi nerute, E eruam: ese nerute le isipi abele kosker, abara kimiar dituak, E eruam.

¹⁹ Nerute lu giz ra apu, E ame uali golegole gegur, pako mus uali, E mamor emeri gaire gerger uridili, a debe leuer ero:

²⁰ Nerute le nole lu kak, nei Lazaro, E eidi abi gab te ge, ege E badbad:

²¹ Ege E lagelag ero lu giz ra leuer poipi, abi laulaulam; a omai giz esomed abara bad.

²² Ege abele kerker ge, lu kak le eumilu, ege angela giz abi ais Aberahama ra marmot ge: ege luglug le eumilu, a etkobei.

²³ A Hedisge, E au asiiasi nagri, E egreemalu, E muriz ge erdali Aberahama pako Lazaro E emeri abara marmot ge.

²⁴ E ereretikri, kega, Kara aba, Aberahama, ma kari omare, ma namarida Lazaro akmei tabara

tag pem ni ge, ko itimoar kara uerut; abelelam kaka au asiassi abele ur au be.

²⁵ Ege Aberahama de abi detager, kega, Kara uerem, ma dikiapor, gaire debe lu ma nagri mara eded, a Lazaro nagri adud lu abara eded: a peirdi E nagri sererege, a ma au asiassi.

²⁶ A nerute lu, meriba nagri auak eipu, abelelam keriba umer kak bakeamu uaba uteb, a uaba umer kak tabakeamu keriba uteb.

²⁷ Ege E abi detager, kega, Kara aba, kaka mari damosi ma abi temarida kara aba ra boai;

²⁸ Abelelam faif kara le; ueakai uiaba mamoro asoli, nolea uiaba tabakeamu abele uteb, au asiassi.

²⁹ Ege Aberahama de abi detager, kega, Nagri Mose pako perofeta uiabi dog, iaueakai uiaba asoli.

³⁰ E ge abi detager, kega, Kara aba, Aberahama, nolea: debele nerute le iako takomeda eudelam, ueakai uiaba nagri obazegeda.

³¹ E ge abi detager, kega, Ese uiaba nole asoli Mose pako perofeta, ese nerute le ko eded akaida, a uiaba nole asor kak.

17

¹ E ge tabara kaimeg giz daratagerare, kega, Umele uataruk lu uadatko: epe uaiai abele lu kemle!

² Debele abi perege dimiri au baker sekerseker, a batauered gurim, adud dedkoli nerute kebile.

³ Ua uabim: ese mara le adud tonar marim, ma barditug; ese obazegeda ma abi idigiri.

⁴ Ese sefen gaber netate gerger adud tonar marim, pako sefen gaber netate marim egali, kega, Kaka obazegeda; ma abi idigiri.

⁵ Ege kaimeg giz, Opole detagerare, kega, Ma upinati keriba oituli, ueakai aule.

⁶ Ege Opole lut uiabi daratagerare, kega, Ese uaba oituli mokakalam sinapi ra turum, a uaba detager abele sukamina, Ma darbumu, a emor gur ge; a nolea ner kak.

⁷ Nete uaba memeg le dali sep dereb, pako mamoe asesered, ese tabakeamu sumezlam, E detager, Ma tabakeamu naidi a ero?

⁸ Nalu nolea abi detager, Ma derser leuer, pako teupeiem erpei mara ame uali, a derser gaire lu, a kaka eroli a aree; a esemud a ma ero a ere?

⁹ E detager abele memeg le, iaueakai ikeli lu emetu abi etomereti? Nako nolea.

¹⁰ Mokakalam uaba, ese esemuda ikeli gaire lu uridili kaka uabi etomeret, a uaba detager, kega, Keriba memeg le nolea debele; abelelam lu nolea abkoreb keriba ikeli, abele lu keriba emetu ikeli.

¹¹ Ege E bakeamulu Ierusalema ge, pako Samaria a Galilaia.

¹² Nerute uteb ge osmelu, ge obapitare ten lepera kem, ege uiaba ekue muriz ge:

¹³ Ege uiaba ereretikri, kega, Iesu, Opole, keribi omare.

¹⁴ Ege E uiabi nardarare, ege E uiabi daratagerare, kega, Bakeuare, ua natomertare zogozogo le. Ui ge bakeuare, epe uiaba idigiri.

¹⁵ Nerute le emetu opasereret emetu idigir, E ko akomelu, ege Ade desper, a au ereretikri:

16 Ekesmer abi tetet ge, a abi esoao: E Samaria le.

17 Ege Iesu de abi detager, kega, Emetu kaka ten le nadigirda. Nade nain le?

18 Ui ge nole opasereret kak, akomeret kak, Ade esoao kak, no abele Samaria le.

19 Ege E abi detager, Ma ekue, bakeamu: ege ma nagri eded mabi oatulam.

20 Ege Faresaio giz ui abi itmerare, Na uar ge Ade ra baselaia uatabaruk? ege E uiabi daratagerare, kega, Ade ra baselaia nole uatabaruk erkep ge:

21 Nole le detager, kega, Dasmer, peike! a nerute, Ike! abelelam dasmer, Ade ra baselaia nagri uabi dog.

22 Ege E uiabi daratagerare, tabara kaimeg giz, Keubu gerger tabarki uaba lagelag erdali netate gerger Le la Uerem, a nole ardar kak.

23 A uader le giz, uiaba uabi detager, kega, Dasmer peiki! a nerute, Dasmer ike! uaba nole bakeamu, a nole armir kak:

24 Abelelam mokakalam ner be erperida nerute paikai kotor ge, a datki nerute paikai kotor ge; mokakalam gerger Le la Uerem.

25 Abkoreb kekiam gaire asiasi abim, a abele nosik uiaba abi dikaer.

26 Mokakalam Noa de ikerer abuar ge, abkoreb abele gerger Le la Uerem.

27 Uiaba erolare, a erelare, a kosker nasiplare, a bakedida abele kerker Noa nar ge barot, epe meg abger tabarki, ege uiaba uridili baum.

²⁸ Mokakalam Lota de ikerer abuar ge; ui erolare, a erelare, a lu teraplare, a lu iritlare, a meta ikelare;

²⁹ Abuar ge Lota dikaelu Sodoma, a ur a tei mokakalam irmer kotorlam ui ge baum:

³⁰ Mokakalam, abele gerger ge ia Le la Uerem uatabaruk.

³¹ Ese le egimur meta tot ge abele gerger, abara lu muige meta ge, nolea uatabu uaeais: mokakalam le emeri sumez ge, nolea ko akomeret kak.

³² Uaba dikiapore Lota ra kosker.

³³ Ese nerute le deraimer abara eded emeri mapodan, E dedkoli: ese nerute le dedkoli, E nagri debele.

³⁴ Kaka uabi detagereda, kega, Abele ki, neisi le emeri netate sik; nerute le ais, a nerute no ikedi.

³⁵ Neisi kosker edatimir; nerute kosker ais, a nerute no ikedi.

³⁶ Neisi le emeri sumez ge; nerute le ais, a nerute no ikedi.

³⁷ Ui ge abi detagerare, kega, Opole, nade ikeli? Ege E uiabi daratagerare, kega, Abele uteb nagri eud le la gem, gaire aeto etami.

18

¹ Ege E uiabi detaut nerute mer babisidarie, iaueakai ner kak esorerapare, a nolea obogai;

² E uiabi daratagerare, kega, Nerute autumer le emeri nerute uteb, E nole geum Adim, pako leem:

³ Abele uteb nagri kosker, emetu eumida abara kimiar; E ko bakeamulu abim gaire gerger, a abi detager, kega, Ma itimer, le nagri kara lu abi dog.

⁴ Uader gerger umer kak asoli: a keubu ga dikiapore muige taba nerkep ge, kega, Kaka nole geum Adim, pako leem;

⁵ A nerute, abele kosker, emetu eumida abara kimiar, E ner kak kari namosili, kaka ko nautumerare abi lu gem, iaueakai nole kari aogat kak.

⁶ Ege Opole lut uiabi daratagerare, Ua aserare autumer le la mer.

⁷ Ege Ade uapum abelelam gaire abara le, uiaba ner kak ereretikri gerger ge a ki ge, nako uiaba itimer uiaba lu?

⁸ Kaka uabi detagereda, E dudum nautumerare uiaba lu. Ese Le la Uerem uatabaruk, nako E nagri le abim oituli geseb ge?

⁹ E ge daratagerare abele mer babisidarie uiabim uader le, uiaba dikiapor oituli, a uader dituaki:

¹⁰ Neisi le bakeamulei zogo meta ge esorera- pare; nerute Faresaio, a nerute telona.

¹¹ Faresaio no tepteb ekue, E gebgeb esorera- pare abele mer, Ade, kaka marim esoao, kaka nole mokakalam uader lu gatkamer le, adud tonar, a eruam, a nole mokakalam abele telona.

¹² Gaire sabath ge, neis gaber kaka leuer baili; kaka mari naisuere ten lu kaka erdali.

¹³ Abele telona ekuei muriz ge, umer kak kotorem egreemalu, epe marmot ge bamu, a detager, kega, Kara Ade, ma omare kaka uit le.

¹⁴ Kaka uabi detager, kega, Abele le bakeamu taba metaem, E debele, nole mokakalam nerute: abelelam E lagelag aule, le kebile; abele le E lagelag kebile, E aule.

¹⁵ Ege uiaba tais sursur sursur uerem, iaueakai E uiabi uaituti: ege kaimeg giz erdarare, ege uiaba daisumdarare.

¹⁶ Iesu de nardarare, a uiabi darabgerare, kega, Karim sursur sursur uerem taraisare, ua nolea daraisumdarare: abelelam mokakalam uader emeri Ade ra baselaia.

¹⁷ Ageakar, kaka uabi detagereda, Ese nerute le nolea erpei Ade ra baselaia, E mokakalam kebile, umer kak ko bardare.

¹⁸ Ege nerute kole lut abi itimer, kega, Ereuer debele, nalu lu kaka ikeli, iaueakai kaka nagri eded aseamur kak?

¹⁹ A Iesu de abi detager, kega, Nalu ma detager kaka debele? nolea le debele, netate Ade tepteb.

²⁰ Ege ma umele Ade ra gelar, Ma nolea adud tonar, Ma nolea ipit eumilu nerute le, Ma nolea eruam, Ma nolea bes mer, Mamoro asoli mabi abera a apuera.

²¹ Ege E abi detager, kega, Kaka irmili gaire lu uridili kebi ueremlam.

²² Ege Iesu de asoli abara mer, ege abi detager, kega, Netate lu ma nolea erdali: ma terapei mara lu uridili, ma naisuerare uader le nole lu kak, iaueakai ma nagri debe lu kotor ge: a ma tabakeam, kari narmili.

²³ Ege E asoli abele mer, abara nerkep au asiassi; abelelam E lu giz ra apu.

²⁴ Epe Iesu abi dasmer, E detager, kega, Au beber lu giz ra apu barota Ade ra baselaia!

²⁵ Kamela norgor ko badare atketlu muige, a le lu giz ra apu etkoprida Ade ra baselaia badare.

26 Uader le giz aserare abele mer, a uiaba detagerare, kega, Ese mokakalam, nete le umele eded?

27 Ege E uiabi daratagerare, kega, Abele lu le umer kak ikeli, epe Ade umele ikeli.

28 Epe Peteru abi detager, kega, Dasmer, keriba dikaer gaire lu uridili, a keriba mari irmili.

29 Ege E uiabi daratagerare, kega, Ageakar, kaka uabi detager, kega, Ese nerute le dikaer tabara meta, pako aba a apu, pako tabara le, pako tabara kosker, a omasker, Ade ra baselalam,

30 Epe E nagri gaire dordor lu peirdi, pako kerker ge niaiem, eded aseamur kak.

31 E ge naisare tuelf le, E uiabi daratagerare, Dasmer, mi nabakeuare Ierusalemam, iaueakai ageakarem gaire lu uridili perofeta giz detarare abele mer abim Le la Uerem.

32 Abelelam, E nakuarare uiabim gaire nogle, ui ge abi negdegarare, a abi dedkoli, a uiaba mosu ituare:

33 A uiaba abi damarik, a abi ipit eumilu: a thri gerger E ko eded akaida.

34 A uiaba umer kak asoli gaire lu; ege ispilu abele mer uiabim, uiaba umer kak abele mer, E uiabi daratagerare.

35 Ege E maike Ieriko ge, a nerute sadamer le emeri gab ge E lu damosi:

36 Ege E asor gaire le lakub bakeuare, E uiabi nautumerare, kega, Nalu abele lu?

37 Ui ge abi detagerare, kega, Iesu, Nazareta le, E bakeamu.

³⁸ Ege E ereretikri, kega, Iesu, Daida ra Uerem, ma kari omare.

³⁹ Ui ge, uader kekiam, a abi daisumdarare, Ma baimi: epe E au kase ereretikri, Daida ra Uerem, ma kari omare.

⁴⁰ Ege Iesu ekuei, a uiabi daratagerare, kega, Karim tegardare; ege abi maiem, a abi itimer, kega,

⁴¹ Nalu lu ma laglag, kaka marim akere? E abim detaut, kega, Opole, kara pone bakaerti.

⁴² Ege Iesu de abi detager, kega, Mara pone obakaelei: mabi oatulam ma nagri eded.

⁴³ Ege abara pone bakaelei, E abi irmili, E Ade deseper: ege abele le uridili ui nardarare, epe uiaba Ade desepereda.

19

¹ E Ieriko ge osemelu, a bakeamulu.

² Dasmer nerute le, abara nei Sakaio; E au telona le, a lu giz.

³ E laglag dasmer, Iesu nako; a umer kak abelelam gaire le lakub, a nerute, E teupei.

⁴ Ege E au koreder gaire le la opem, E ogi nerute lu ge, nei sukamoru, E laglag abi dasmer: abelelam E abi gab dirier.

⁵ Ege Iesu tabakeamulu abele uteb ge, a egreemalu, a abi erdar, E abi detager, kega, Sakaio, ma tarabu; abkoreb kaka emeri mara meta abele gerger.

⁶ Ege E tabu, abi detager, E au sererege.

⁷ Ege gaire le giz abi erdarare, a uiaba mudmer, kega, E bakeamu uit le la meta.

⁸ A Sakaio ekuei, a abi detager, kega, Opole, dasmer, kaka arage karbara lu uader nole lu kak; ese nerute le au ueku karim kaka uapum, a kaka bodomalam neis a neis gaber.

⁹ Ege Iesu de abi detager, kega, Azimoaret tabarki abele boai abele gerger ge, abelelam E dali Aberahama ra uerem.

¹⁰ Abelelam Ade ra Uerem tabarki deraimerare le badimirida, ueakai uerkabu.

¹¹ Ui ge dimiruartare abele lu, ege E uiabim ko detager nerute mer babisdarie, iaueakai maike Ieruselema, abelelam ui dikiaporare Ade ra baselaia pe detomereta.

¹² Abelelam E uiabi detager, kega, Nerute kele bakeamu nerute muriz gedim, ueakai nagri lu, a E lagelag opole, a iako takomeda.

¹³ Ege E darabgerare ten abara memeg le, E uiabi naisuerare ten paun, E uiabi daratagerare, Ua erapare a iako uatabakomeret.

¹⁴ Ege abara ged au ueku abim, abelelam uiaba emarkare, a detagerare, kega, Keriba nole lagelag abele le keriba opole.

¹⁵ E ge ko akomelu abelelam E nagri lu, ueakai E opole, ege E uiabi darabgerare, tabara memeg le, nagri abara mani uiabi dog, iaueakai E umele nako abara mani dordor lu terapei.

¹⁶ A nerute le tabakeamulu, a abi detager, kega, Kole, mara paun, kaka nagri ten paun ko.

¹⁷ E abi detager, kega, Au debele, debe memeg le: abelelam ma ageakar kebi lu, ma sirdam ten uteb.

¹⁸ Nerute le tabakeamu, a abi detager, kega, Kole, mara paun, kaka nagri faif paun ko.

19 E abi detager, kega, Ma sirdam faif uteb.

20 Nerute le tabakeamu, a abi detager, kega, Kole, dasmer, mara paun, kaka ikedi ages:

21 Abelelam kaka mari geum, kaka umele mara tonar: ma ais abele lu ma nolea ikedi lokod ge, ma igiri abele saito ma nolea ariti kak.

22 Ege E abi detager, kega, abele memeg le adud tonar, Mara mer abelelam kaka mari bodomalam. Ma umele kara tonar, kaka ais abele lu kaka nolea ikedi lokod ge, a igiri abele saito nolea kara aritilam;

23 Nalugelam ma nolea ais kara mani abele meta mani terapei, iaueakai kaka iako tarakomelu nagri lu abkoreb?

24 E uiabi daratagerare, uader obako, Uaba itkamer abele paun, ikuar nerute le ten paun.

25 Ui ge abi detagerare, kega, Kole, nagri ten paun.

26 Abelelam kaka uabi detagereda, Ese le nagri lu, E ais; ese nerute le nolea lu kak, E itkamer abara lu.

27 Nerute, uader kari derar, uiaba nolea kari lakak ko uiaba opole, uaba kari eguatumur peike abele uteb ge, uaba ipit kara opem.

28 Ege mer eseemulu, E kekiam bakeamulu Ierusalemale ge.

29 Ege maike Bethefage a Bethania, abele paser ge, nei Oliua, epe E namarid neis abara kaimeg giz,

30 E uiabi daratager, kega, Ua bakeamulam abele uteb uabi opem, ese ua osemedariei abele uteb ge, uaba erdali kebi asina didbareni, nolea

le abi sor agimur kak: uaba abi detue, karim tegared.

³¹ Ese nerute le uabi itimer, Nalugelam uaba abi detue? A ua abi detageram, kega, Opole abi lagelag.

³² Ui ge bakeamulei, a ui erdali, mokakalam abara mer uiabi daratager,

³³ Ui ge detuei abele kebi asina, a uader le giz uiabi nautumerare, kega, Nalugem uaba detuei abele kebi asina?

³⁴ A uiaba detaut, kega, Opole abi lagelag.

³⁵ Ege ui abi egaredelei Iesuim: ui ge uiaba ame uali abi sor ge dikmerikare abele kebi asina ge, ui ge Iesui agiserare abi sorge igimerare.

³⁶ E bakeamulu, a uiaba ame uali gab ge esagerare.

³⁷ Ege maike abele gorgor passer ge, nei Oliua, ui ge, abara kaimeg giz uridili, ditimedarare sererege, uiaba au ereretikri Ade despelare, abelelam atamelam uridili uiaba erdali;

³⁸ Ege uiaba detautare, kega, Uerkab pe abele Opole, tabarki Iehoua ra nei ge: uerkab kotor ge, a deseper abele lu tumege.

³⁹ Ege uader Faresaio giz, pako lekub ge, uiaba abim detager, kega, Ereuer le, ma bardaratkare mabara kaimeg giz.

⁴⁰ E uiabi daratagerare, kega, Kaka uabi detager, ese uiaba nole mer kak, a baker peike umele detaut.

⁴¹ Maike, E erdali abele uteb, E ezoli,

⁴² E abi detager, kega, Ese ma umele abele gerger, abele lu ueakai marim debele! a nerute, ma nole erdali.

⁴³ Abelelam keubu gerger uatabaruk, gaire uaba taip uanartare a uanatumdare, uader au ueku uabim, uiaba deraueli marim, gaire uteb uridili,

⁴⁴ A uiaba mari ikeli no sep ise, pako mara omasker muige mari dog; nole nerute baker ko igi tumem nerute baker muige mari dog; abelelam ma nole umer kak na uar ge uatabaruk mari uanardar.

⁴⁵ E balu muige zogo meta, ge, E namuare adem uader le uiaba lu therapeirare,

⁴⁶ E uiabi daratagerare, kega, Emetu detali, Kara meta, esorerapare meta: a uaba ikeli mokakalam baker kur ge eruam le giz.

⁴⁷ Ege E ereuerem muige zogo meta gaire gerger. A zogozogo le giz, pako aotale giz, pako tarim le, abele ged ge, ege uiaba lagelag abi ipit:

⁴⁸ A nerute, uiaba umer kak ikeli; abelelam abele ged ge uridili au lagelag abi asoli.

20

¹ Nerute gerger, E ereuerem abele ged ge, muige zogo meta, a etomeret debe mer, a uiaba zogozogo le giz a aotale giz, a aule giz ekue;

² A uiaba abi detager, kega, Mase ma keribi detager, Nalu abele sirdam ma ikeli abele gaire lu? nete le mari ikuar abele sirdam?

³ E uiabi detaut, kega, Kaka uabi itimer netate merem: ua kari natagerare:

⁴ Nako Ioane ra bapataiso nagelam, nako kotorlam, nako lelam?

⁵ A ui mer batagerare, kega, Ese meriba detaut kotorlam; mena E meribi detager, kega, Nalugelam uaba nole abi oituli?

⁶ Ese meriba detager, kega, lelam; epe abele ged ge meribi bakeru ditimeda: abelelam ui ge dikiaporare Ioane perofeta.

⁷ Epe uiaba detaut, kega, Keriba umer kak nagelam.

⁸ Epe Iesu uiabi daratagerare, kega, Kaka umer kak uabi etomeret abele sirdam kaka ikeli gaire lu uridili.

⁹ Ege E uiabi daratagerare abele mer babis-darie: Nerute le ikeli uina gedub, E uiabi nakuarare uader dorge ikeli abele gedub ge, a E bakeamu muriz gedim gaire gerger barkare.

¹⁰ Ege nurge baruk, E uiabim, gedub le, emariklu nerute memeg le, abele uina turum ko tais: ege uader le, emeri abele gedub ge, uiaba abi damarik, abele le no akomelu nolea turum asis kak.

¹¹ A E ko emariklu nerute memeg le: a uiaba abi ko damarik, a abi dituaki, E ko akomelu nole turum asis kak.

¹² Ege E ko namarkare neisi netate le: a uiaba abi naresedare maike uaeumidare, a ui ge abi adem bakeuidare.

¹³ Ege abele gedub kem le lut dikiapore, kega, Nalu ka akailu? kaka namariklu kabara nasnas uerem: nako, uiaba abi erdali, a abi omare.

¹⁴ A gedub le giz abi erdarare, ege uiaba mer batagerare, kega, Abkesem peike: mi abi apitare, iaueakai mi aisare abara ged.

15 A uiaba adem emarikare sorem abele gedublam, a ui abi ipitare eumilu. Nalu lu gedub kem le lut uiabim ikeli abkoreb?

16 E tabakeamulu, a gedub asesered le narsare, E ko nakuarare uina gedub uiabim uader le. A ui ge asorare, a uiaba detaut, kega, Nolea.

17 E uiabi dasmer a detager, kega, Nalu mer emetu detali, Abele baker tonar tonar le lut adem batauered, a mena ais meta kop tum ge?

18 Ese le ekesmeri abele baker ge tumem, a lid erapei; a ese baker etugered abi tumge, no obamuare.

19 Ege zogozogo le giz, pako aotale giz, uiaba lagelag abi erpei abele haua ge; a uiaba au geum abele ged; abelelam uiaba umele, abele mer uiabim babisdarie.

20 Ui ge deraimerare, a uader namarkare abi dasmerare, a uiaba bes oituli, iaueakai nagri mer, a uiaba ais ikuar opole ra tagem a sirdamem.

21 A ui ge abi itimerare, kega, Ereuer le ae, keriba umele ma barkak detaut pako ereuer, ma nole omare nerute le, a dikaer nerute le, epe ma ereuerem ageakar Ade ra gab:

22 Nako, abkoreb keriba ko ikuar Kaisaraim zegu lu, a nolea?

23 A E umele uiaba dikiapore, ege E uiabi daratagerare, kega, Nalugelam uaba kari mirem?

24 Debele ua kari denari natomertare. Nete ra op abele, pako abele detarda? Ui detagerare, kega, Kaisara.

25 Ege E uiabi daratagerare, kega, Kaisara ra lu, Kaisaraim ikuar; Ade ra lu, Adim ikuar.

²⁶ Ui umer kak derpeirare abara mer le op ge abele ged ge: a ui abara mer damerare, a uiaba mer kak.

²⁷ Uader Sadukaio giz, abim tabakeuare, a ui dikiaporare, kega, Nole le ko eded akaida eudelam; a uiaba abi itimerare, kega,

²⁸ Ereuer le ae, Mose detali keribim, Ese nerute le la keimer eumida, abara kosker dikaerti, a nole uerem kak, abara keimer abele kosker egared, ko keimer kesem.

²⁹ Sefen keimer giz: narbet kekiam ko ispida abara kosker, epe eumid, nole kesem kak;

³⁰ A nerute keimer abele kosker egared, epe eumid, nolea kesem kak, mokakalam nerute keimer.

³¹ A thri le ko ispid; mokakalam bakedida sefen le, uiaba eumida, nole kesem kak.

³² A keubu, kosker eumida.

³³ Ese ko eded akaida tabarki, nete le uiabelam ais abele kosker? abelelam sefen le egared abele kosker.

³⁴ Iesu uiabim detaut, kega, Peirdi, abele eded, kimiar kosker ispid:

³⁵ A uiaba nagri debele, abele ko eded akaid, a nagri niaiem kerker, uiaba nole ispid kosker, a nole ispid kimiar:

³⁶ A uiaba nolea ko eumid: epe uiaba mokakalam angela; a uiaba Ade ra omasker, a le giz ko eded akaida.

³⁷ Abele ko eded akaida eudelam, Mose de natomertare abele lu, nerute lu dardar, ko etomeret Iehoua Aberahama ra Ade, a Isaaka ra Ade, a Iakobo ra Ade.

³⁸ E nole uiaba Ade, abele le eumida, epe le giz eded: abelelam le uridili eded abielam.

³⁹ Ege uader aotale giz abi detager, kega, Ereuer le ae, mara mer au barkak.

⁴⁰ Keubu uiaba nolea ko saserim abi itimer nerute lu.

⁴¹ Ege E uiabi daratagerare, kega, Nako uader detaut, Keriso, Dauida ra uerem?

⁴² Ege Dauida de detaut, Salamo jauali, E detager, kega, Iehoua, kara Opole detager, kega, Ma emeri kara tuter tag pek,

⁴³ Kaka ikeli uader mari derar, abele uteb ma teter emeri.

⁴⁴ Abele lu Dauida de etomeret abara Opole, nako ikeli abara uerem?

⁴⁵ Ege E uiabim detager, tabara kaimeg giz, a gaire le uridili abele ged ge, uiaba asarare,

⁴⁶ Ege uaba mamoro dasmerare gaire le aotale giz, uiaba digemeli perper am uali, ege uiaba lagelag gaire le uiabi omare pur uteb ge, pako aule bao sunago ge, a aule lu eidi abele uteb ge leuer eroare;

⁴⁷ Ege uader dedkoli mai kosker ra meta, a uiaba esorerapare au perper: E ispilu, a keubu uiaba au bodomalam.

21

¹ Ege E egreemalu, E erdali lu giz ra apu, uiaba batauered uiaba mani, abele uteb mani ikedi.

² Ege E erdali nerute mai kosker, nole lu kak, E batauered neisi kebi mani.

³ Ege E uiabi detager, kega, Ageakar, kaka uabi detager, kega, Abele mai kosker, abara mani batauered, E aule uiabi dog uridili:

⁴ Abelelam uiaba uridili batauered uiaba mani, gaire uiaba lulam: ege abele mai kosker, nolea lu kak, E batauered abara kebi mani uridili, abkoreb abara eded.

⁵ Ege uader mer batagerare abele lu muige zogo meta ge, ege mamoro derser debe baker, pako uader zeku lu muige zogo meta, E uiabim daratagerare, kega,

⁶ Ege gaire lu uaba dasmerare, keubu gerger tabarki, nole baker ko igi tumem nerute baker, a nole abu kak.

⁷ Ui ge abi itimerare, kega, Ereuer le, na kerker ge gaire lu tabarki? a nalu atamelam gaire lu tabarki?

⁸ E uiabim detaut, kega, Uaba mamoro dikiaporare, nerute le uabi okardare: abelelam gaire le ko uatabarkare kara nei ge, kega, Kakanali. Ege abele kerker maike: uaba nole uiabim irimili.

⁹ Ese uaba asoli ares, a mirem, a uaba nole geum: abkoreb kekiam abele lu uatabaruk, a mop uarem.

¹⁰ E uiabi daratagereda, kega, Nerute ged tekuei obapit nerute ged, a nerute baselaia obapit nerute baselaia:

¹¹ Au demali ia uanagiri abele uteb ge, a nerute uteb ge, a uererege, a gim gim, a urker, a gaire atamelam kotor ge.

¹² Gaire lu nole tabarki, a uiaba uabi erpei, a dedkoli, a uiaba uabi uademmarkar sunagoem, pako audbar metaem, a uiaba uabi uadeguatare opole giz opem, kara neilam.

¹³ Abele gaire lu uabim atamelam.

14 Abele lu, debele ikedi uabi nerkep ge, iaueakai uaba nole kekiam deraimer, a dikiapor na mer ko detager:

15 Abelelam kaka uabi dekuarda abele mer, a pardar, umer kak nerute le uabi asared, uaba au saserim.

16 A uaba ab giz emarik, a keimer giz, a boai giz; a uader uabi ipit eumilu.

17 Gaire le uridili ko uabi derar, kara neilam.

18 A uaba kerem mus, nole nerute mus abi.

19 Ese uaba debe tonar, a uaba eded nagri.

20 Ese uaba erdali Ierusalema ge, urker ares deraueli, a uaba dikiapor maike dedkoli.

21 Abele gerger uader emeri Iudaia ge, debele uiaba bakeuare paserem; uader emeri muige abele uteb ge, debele ui adem obakeuare; uader emeri sumez ge, uiaba nole ko akomeda muige abele uteb ge.

22 Abelelam abele kerker bodomalam, iaueakai gaire lu ageakarem emetu detarare.

23 Uaiyai uiaba kosker kem, pako uiaba nano emeli abele gerger giz! abelelam au asias tabarki abele ged ge, pako urker.

24 A uiaba eumid teibur aosaos tulik gargerlam, a uiaba no bakeamu gaire ged uridili: a gaire nogle uiaba dedkoli Ierusalema, a keubu abele nogle giz uiaba erdali uiaba mop.

25 Lem kotor ge nagri atamelam, pako meb, a uer giz; geseb ge gaire ged nagri geum, a gur ge maisu a zauber nagri.

26 Gaire le no eumida abele geum ge, a naokaili gaire lu ko tabarki gesepem: abelelam urker kotorlam demali.

27 Epe uiaba erdali Le la Uerem tabarki baz kotor ge, E au adigri au zoromzorom.

28 Ese ditimeda gaire lu, debele uaba bager a kerem iteare; abelelam maike uaba eded nagri.

29 E uiabim detager, nerute mer babisdarie, kega, Uaba dasmerare abele suke pako gaire lu uridili:

30 Ese lulam eperekilu, a uaba dasmer, a uaba umele maike urueri urut.

31 Abkoreb, ese uaba erdali abele lu emetu ikeli, a uaba dikiapor Ade ra baselaia maike.

32 Ageakar, kaka uabi detager, kega, Abele nosik le nole abu kak, kekiam abele gaire lu uridili tabarki.

33 Kotor a geseb ko abu, a kara mer giz nole abu kak,

34 Ua mamoro dasmer, iaueakai uaba nerkep nole beber, a gebgeb, a paim, a nole badumu geseb lugem, abelelam abele gerger keserkeser tabarki:

35 Abelelam mokakalam pom tabarki, gaire le uridili emeri geseb ge.

36 Debele uaba mamoro dasmer, a derser, a ner kak esorerapare, iaueakai uaba au saserim, gaire lu maike tabarki, a mamoro ekuei opem Le la Uerem.

37 Abara tonar E ereuerem gerger ge, muige zogo meta, ki ge osmed, E emeri nerute paser, nei atker Oliua.

38 Idim ge, abele ged ge uridili tabakeuare abele zogo meta ge, lagelag asarare abara mer.

22

¹ Ege maike uetpur, areto nole aber kak, abele nei atker Paseka.

² Zogozogo le, pako aotale giz uiaba deraimer-are nalu tonar uiaba ko abi ipitare; abelelam uiaba au geum abele ged.

³ Ege Satana balu muige Iuda, nei atker Isakar-iota, abara nerkep, E nerute tuelf le.

⁴ E bakeamulu zogozogo le a pako ares kerem le, a uiabi daratagerare, kega, Nalu ka akailu, iaueakai abi keserkeser uabim?

⁵ Ege ui au sererege, a abi detagerare ko abim mani naisuerare.

⁶ Abara nerkep au sererege, E ditimedelu abi deraimer, na uarge umele abi keserkeser, a abi uiabi uanatomeretare, a nole lekub kak.

⁷ Ege abele gerger, areto nole aber kak, tabarki, abkoreb paseka ipit.

⁸ Ege E uiabi namariklu Peteru a Ioane, a daratager, kega, Ua bakeamulam derseram abele paseka, abkoreb meribim mi aroare.

⁹ Epe uiaba abi detager, kega, Na uteb ge mama lagelag ki derserei?

¹⁰ Ege E uiabi daratager, kega, Dasmeram, ese ua erdariei abele uteb muige, a ua op nerute le dipitiei, E ais nini tarpor; a ua abi irmirauam abele meta ge obaoa.

¹¹ A uaba itimer boai kemle, Ereuer le mari detager, kega, Nade suble la uteb, paseka derser ki aroare, kaka pako kara kaimeg giz?

¹² Ege E uabi natomelu nerute au uteb kotor, emetu derser: a uaba paseka derser.

13 Ui bakeamulei, a erdarei, mokakalam abara mer: epe uiaba paseka derser.

14 Ege abele haua ge, ui baid eroare, epe abara kaimeg giz tuelf le, E uiabi kemem.

15 Ege E uiabi daratagerare, kega, Kara lag, kaka au lagelag kekiam eroli abele paseka uabim, a kara asias nole tabarki:

16 Abelelam kaka uabi detagereda, kega, Kaka nole ko eroli, kekiam Ade ra baselaia ge es-eemud.

17 E tanelu ekao, a esoao, a uiabi daratagerare, kega, Uaba erpei abele tanelu, a uabu nakuarare:

18 Abelelam kaka uabi detagered, Kaka nole eroli uina turum ge, kekiam Ade ra baselaia tabarki.

19 E areto ekao, a esoao, a itur, a uiabi nakuarare, a uiabi daratagerare, kega, Kara gem peike, E uabi nakuarare: uaba ikeli kara atamelam.

20 Ege emetu leuer eroare, a tanelu ekao ko, E uiabi daratagerare, kega, Abele tanelu kerkar tom kara mam, uabim epaitered.

21 Dasmer, kari dog abele laulau ge, nerute le la tag, E kari keserker.

22 Le la Uerem obakeamu mokakalam abim gobarem: epe abele le abi keserkeser, Uaiiai!

23 Ui ge ditimedare deraimerare, nete le ikeli abele lu.

24 A uiaba asared, nete le aule.

25 E uiabi daratagerare, kega, Nogle la opole, uiaba opole; uader uiabi sirdam, etomereti uiaba au debe tonar.

²⁶ A uaba nole mokakalam: ese le uabim aule, E mokakalam kebile; ese le sirdamu, E memeg le.

²⁷ Epe nete le aule, nako le eidi eroli, nako memeg le? nako nole le eidi eroli? epe kaka uabi kemem mokakalam nerute memeg le.

²⁸ Epe uaba mamoro emeri kari mirem:

²⁹ Mokakalam kara Aba E kari ikuar abara baselaia, abkoreb kaka uabi ikuar,

³⁰ Iaueakai uaba eroli, a erehi, abele leuer aro uteb kara baselaia ge, a emeri opole bao ge, a itimer Isaraela tuelf nosik.

³¹ Ege Opole abi detager, kega, Simona, Simona, dasmer, Satana au lagelag uabim, iuaeakai E uabim derser, mokakalam saito derser:

³² A kaka Adim damosi marim, iaueakai mara oituli nole aseemur kak: marim, ese depegeli mara nerkep, a mama au saserim mara le.

³³ Ege E abim detaut, kega, Opole, kaka marim okakis bakeamu audubar meta, pako eumida.

³⁴ Ege E abi detager, kega, Peteru, kaka mara natager, kega, Kimiar faul nole ereretikri kak abele ki, a kekiam thri kari nasared ma nole kari umer kak.

³⁵ Ege E uiabi daratagerare, kega, Kaka uabi demarida, uaba nole epei mani, a pako epei, a teter gab, nako uaba nole nerute lu kak? A uiaba abi detager, kega, Nolea.

³⁶ E uiabi daratagerare, kega, Abele lu, ese nerute le nagri epei mani, debele erpei, a pako epei; le nole teibur aosos tulik, debele abara am uali terapei, ko nagri.

³⁷ Abelelam kaka uabi detagereda, kega, Debele karim ageakarem abele lu emetu detar, A okakis etag uader uit tonar le; abelelam pe gaire lu karim emetu detarda maike detomeret.

³⁸ Uiaba abi detagerare, kega, Opole, dasmer, neis teibur aosos tulik. E uiabi daratagerare, kega, Sina.

³⁹ A E bakeamulu adem digemli nerute paser, nei Oliua, mokakalam abara tonar; abara kaimeg giz abi irmilare.

⁴⁰ Abele uteb ge, E emeri, a uiabi daratagerare, kega, Uaba esorerapare, iaueakai nole mirem tabarki.

⁴¹ Ege E bakeamulu adem uiabelam, mokakalam baker murzem batauered; E kokamamu, a esorerapare.

⁴² E abi detager, kega, Aba, ese ma lagelag, abele tanelu karielam adem: kara lag nole ikeli, debele mabara lag ikeroa.

⁴³ Angela kotor ge abi etomelu, E ikuar saserim.

⁴⁴ E au asias, a elele esorerapare: abara mereg mokakalam kepnam, E abi sep ge.

⁴⁵ E emetu esorerapare, a ekueilu bakeamulu taba kaimegem, a uiabi naradarare ui ge utirdeder, uiaba nerkep au beber,

⁴⁶ E uiabi daratagerare, kega, Nalugelam uaba uteidi? ua bako, esorerapare, iaueakai nole mirem barot.

⁴⁷ E uiabi meratager, a dasmer, gaire le lakub pako Iuda, nerute le tuelf lelam, E kekiam uiabi dog; a maiem Iesuim, E lagelag eskos.

⁴⁸ A Iesu abi detager, kega, Iuda, ma keserkeser Le la Uerem, a eskos?

49 Uiaba umele abele lu uiaba ikeli, ui ge abi detagerare, kega, Opole, nako ki uiabi daramerkare abele teibur aosos tulika?

50 Nerute le uiabelam E ipit zogozogo le la memeg le, E dikiam abara tuter laip.

51 A Iesu de uiabi daratagerare, kega, Sina. E itut abara laip, a ko barkak.

52 Iesu uiabim detager, gaire zogozogo le, pako kerem le abele zogo meta ge, pako aule giz, ui tabakeauare abim, Nako uaba karim tabakeauare, gaire teibur aosos tulik, a gabagaba kem, mokakalam deraimerare lugatkamer le?

53 Mi okakis zogo meta ge, gaire gerger, a uaba tag nole kari erpei: a uaba ikeli abele ki, a kupikupi sirdam.

54 A ui ge abi erpeirare, a tegared zogozogo le giz ra meta. A Peteru muriz ge abi irimli.

55 Ui ge ur eskaisirare muige meta ge, a uiaba lokod ge emeri, a Peteru uiabi kemem.

56 Nerute memeg neur, E abi erdali emeri maike ur ge, E dasmer, a detager, kega, Abele le E Iesuim okakis.

57 E abi asared, kega, Neur, kaka nole umer kak abele le.

58 Mena, nerute le ko abi erdar, a kega, Ma uiaba le. A Peteru abi detager, kega, Nolea kaka.

59 Ege emetu netate haua, nerute le lut elele detager, kega, Ageakar, abele le E abi kemem: abelelam E Galilaia le.

60 Peteru abi detager, kega, Kaka nole umer kak abele lu mama detautili. Epe kimiar faul sobkak ereretikri, abele kerker E mer egali.

⁶¹ Ege Opole egreemalu, E abi dasmer Peteru. Epe Peteru de ga dikiapor Iesu ra mer ge, abi detager, kega, Kimiar faul nole ereretikri, ma neis netat kari nasared.

⁶² Ege Peteru adem eosmelu, a au ezoli.

⁶³ Uader uiaba Iesu erpeirare, a abi negneg, a damarik.

⁶⁴ Uiaba demed abara op, a uiaba abara op erap, a itimer, kega, Ma dikiapor, nete mari ipit?

⁶⁵ Gaire mer, a uader abi adud meru ikeli.

⁶⁶ Ege gerger ge, gaire kerem le, abele ged ge, uiaba etami netat uteb, pako zogozogo le giz a aotale giz; epe uiaba abi egared uiabi opem, a kega,

⁶⁷ Ese ma Keriso kar, ma detaut keribim. Epe E uiabim detager, kega, Ese kaka uabi detager, a uaba nole kari oituli:

⁶⁸ Ese kaka uabi itimer, a uaba nole kari natautare.

⁶⁹ E ditimeda peirdi, Ade ra Uerem emeri tuter peik, Ade ra au adigri.

⁷⁰ Ui uridili abi detaut, kega, Nako mama Ade ra Uerem? E uiabi daratagerare, kega, Karim pe ua abele mer tegareda.

⁷¹ A uiaba detaut, kega, Nalugelam meriba iako ko deraimer uader etomereti? abelelam meriba emetu asoli abara mer.

23

¹ Ege uiaba uridili bako, a abi egardare Pila-toim,

² A abi etomeretare, kega, Keriba erdali abele le, E mer desakili abele ged ge, E daisumda nole Kaisarai lu aisuerare, kega, E Keriso Opole.

³ A Pilato abi itimer, kega, Nako ma Iudaia giz Opole? Ege E abim detaut, kega, Eko, mama detager.

⁴ Pilato de uiabi daratagerare, zozozogo le, a le lakub, Kaka nole nerute uit lu ardar kak abi dog.

⁵ A uiaba mena elele detager, kega, Epe E desakili abele ged ge, E ereuerem Iudaia uridili, E ditimeda Galilaia, a bakedida abele uteb.

⁶ Ege Pilato abele lu asor, E nautumerare, kega, E Galilaia le?

⁷ E umele E Heroda ra baselaia le, E abi Herodaim ikuar, abele kerker E emeri Ierusalem ge.

⁸ Heroda de Iesu erdali, E au sererege: abelelam gaire gerger E lagelag abi dasmer, E asoli, kega, E gaire lu ikeli; E lagelag dasmer atamelam ikeli.

⁹ E abi itimer gaire merem; epe E nole abi detager nerute mer.

¹⁰ A zozozogo le a aotale giz, ui bako, a elele abi etomeret.

¹¹ Heroda pako abara ares le, uiaba abi dituaki, a abi negneg, a zorumzorom uali ame, a ko Pilatoim egaredare.

¹² Ege Pilato a Heroda, uiaba ko debele abele gerger: abelelam uiaba kekiam ueku ueku.

¹³ Ege Pilato de etami netat uteb zozozogo le, a tarim le, abele ged ge,

¹⁴ E uiabi daratagerare, Ua tegardare abele le karim, mokakalam pe desakili abele ged: dasmer, kaka itimer uaba op, kaka nole ardar kak nerute lu abi dog, nole abkoreb gaire mer uaba abi etomeret:

¹⁵ A Heroda nole umer kak: abelelam kaka uabi demarida abim; dasmer, nole nerute lu ikeli iaueakai abkoreb eumida.

¹⁶ Abele lu kaka kekiam barditug, a keuba kaka abi adem.

¹⁷ Debele, E namarid nerute le uiabim, abele uetpur ge.

¹⁸ Le lakub uridili, uiaba ereretikri, kega, Adem abele le, debele Barabasa emarida keribim:

¹⁹ Abele le azirkare muige audbar meta, E adud tonar abele uteb ge, a le ipit eumida.

²⁰ Epe Pilato ko uiabim mer detaut, abelelam E lagelag Iesu adem;

²¹ A uiaba au kase ereretikri, kega, Satauroem, satauroem.

²² E neisi netat gaber E detaut, kega, Nalu adud E ikeli? Kaka nole umer kak adud lu ikeli iaueakai abkoreb eumida: debele kaka abi barditug, a keubu namarida.

²³ A uiaba elele ereretikri, a damos, iauaekai abi satauroem. Uiaba kodomer au saserim, pako zozozogo le giz.

²⁴ Ege Pilato de uiabi daratagerare, kega, Uaba lag ikeli.

²⁵ Ege E abi adem detue nerute le uiabelam, muige audbar metalam, abelelam E au adud tonar, a le ipit, uiaba au lagelag abi adem emarik; Epe E Iesui uiabi nakuarare, mokakalam uiaba lag.

²⁶ Uiaba abi tegared, epe uiaba erpei Simona, nerute Kurene, le, E tabakeam sumezlam, a uiaba abi ikuar abele satauro, E kodrom dike-merik, a Iesui irmili.

27 A gaire le lakub abi irmili, a kosker giz, a uiaba bazuer.

28 A Iesu uiabim egreemalu, a daratagerare, kega, Ierusalem neur giz, uaba nole ezoli karim, debele ua uabu baguauem pako uaba omasker.

29 Dasmer, keubu kerker tabarki uader detaut, kega, Uerkab soasoa, kosker nole uerem kak, pako nano are kak.

30 Abele kerker, le giz detaut, kega, Debele paser keribi tumge abi; a uiaba detager, kega, Daip mudige ki nabaspe.

31 Abelelam ese ikeli abele kereskeres lu, nalu lu ikeli abkoreb uatuet lu?

32 Neisi uit le taragardare abi okakis, kem eumidare.

33 A baos abele uteb, nei atker, Kerem lid ra uteb, a uiaba abi satauro abele uteb ge, okakis neisi uit le, nerute tuter peik, nerute ber peik.

34 Epe Iesu abi detager, kega, Kara Aba, ma uiabi idigir; abelelam uiaba umer kak abele lu uiaba ikeli. A ui ge abara am uali barapeirare, a luglug ikeli.

35 Abele ged, uiaba ekuei a dasmerare. Tarim le pako uiaba abi negneg, a kega, E uader idigir; ese E Keriso, debele tababu idigir, Ade abi sererege.

36 Ege ares le giz abi neg degarare, uiaba abim bakeuare abi ikuar uinega,

37 A uiaba detautare, kega, Ese ma Iudaia Opole mabu idigir.

38 Abele jauali detali tumge Heleni mer, a Roma, a Heberu, ABELE IUDAIA GIZ RA OPOLE.

³⁹ Nerute le emered abi dog, adud mer abim, kega, Ese ma Keriso, debele mabu idigir, pako keribi.

⁴⁰ A nerute le abi daisumda, kega, Nako ma nole Adim geum, abelelam meriba okakis bodomalam?

⁴¹ Abkoreb meriba bodomalam; abelelam meriba bodomalam abkoreb abele lu meriba ikeli: epe abele le, E nole adud ikeli.

⁴² A E Iesui detager, kega, Opole, ese ma tabakeamu mara baselaia ma nole kari okat-aprik.

⁴³ Ege Iesu de abi detaut, kega, Ageakar, kaka mari detager, Abele gerger meriba obapit Paradaiso.

⁴⁴ Ege abele haua sikes baruk, abele ged kupikupi, bakedilu abele nain haua ge.

⁴⁵ Epe lem kupikupi: abele uali demed, muige zogo meta, tababu batoat.

⁴⁶ Ege Iesu au ereretikri, kega, Kara Ab, kaka mari ikuar karbara lamar mari tagem: E abele mer detaut, abara eud baruk.

⁴⁷ Epe abele kerem le, asesered netate handed ares le, E erdali abele lu, E Adim damer, kega, Ageakar, abele le tabara tonar barkak.

⁴⁸ Ege uader le giz etameare abele uteb ge, uiaba dasmerare abele lu, a marmot ge bamuare, a bakomeret.

⁴⁹ A uader abi umele, uiaba ekuei muriz ge, pako uader kosker giz abi irmilare Galilaialam, a uiaba dasmerare abele lu.

⁵⁰ Dasmer, nerute le, nei Iosefa, E tarim le, E debe tonar,

51 (E nole upinati uiaba mer, pako abele sirdame, pako abele lu), E Arimathia le. E Iudaia ra uteb, E naokaili Ade ra baselaia ge:

52 E bakeam Pilatoim, E damosi Iesu ra gem.

53 E tais, a sopem ereb abele uali lino, E ikedi abele ao ge, baker kur, nole atkobeir kak.

54 Abele gerger uetpur, maike sabath.

55 Ege uader kosker, abi kemem tabakeauare Galilaialam, uiaba irmilare, a dasmer abele ao ge, abara gem azirik.

56 Ege uiaba ko akomeda, a derser lu debe laglag, pako uakasu debe laglag. Ege uiaba nerezi sabath ge, abkoreb Ade ra mer.

24

1 Ege ditimedelu abele gerger sabath ge, uiaba bakeuare abele ao ge, bane ge, uiaba ais abele lu debe laglag emetu derser, uader kosker uiabi kemem.

2 Ege uiaba erdali abele baker aolam emetu diski.

3 Ege uiaba barot muige, uiaba nole erdali Iesu ra gem.

4 Ege uiaba operem abele lu: dasmer, neis le ekuei uiaba opem, am zorumzorom uali:

5 Ege uiaba au geum, a uiaba op esorgiru sepem, ege uiaba detager, kega, Nalu uaba deraimer? E emetu eded akaid, nole uiabi kemem eud le giz,

6 E nole abele uteb, E ko ekuei: uaba dikiapor abara mer abele kerker ge uaba okakis emeri Galilaia ge,

⁷ E detager, kega, Abkoreb Le la Uerem ikuar uit le la tag, a satauro, a neisi netate gerger ko eded akaid.

⁸ A uiaba dikiapor abara mer.

⁹ Ege uiaba ko akomed abele aolam, a uiaba etomeret gaire lu uiabim eleuen le, a pako le uridili.

¹⁰ Maria Magadalena, a Ioana, a Maria Iakobo ra apu, pako uiaba uridili, uiaba etomeret abele lu uiabim aposetelo giz.

¹¹ A ui ge abele mer dikiaporare, kega, No mer pe deke; abelelam nole oatur kak.

¹² Ege Peteru ge ekueilu, E au koreder aoem; E esorgiru, E erdar no uali gaire eskeder; A E akomelu tabara metaem, a damer abele lu.

¹³ Dasmer, neisi le uiaba bakeamulei abele gerger ge nerute utebem, nei Emau, ditimed Emau bakedida Ieruselema sikiste setatio.

¹⁴ Ege uiaba mer atager abele gaire lu uridili ikeli.

¹⁵ Ege uiaba mer atager, a deraimer, epe Iesu maik uiabi dog, a uiaba okakis bakeamu.

¹⁶ A uiaba pone dasam, abelelam uiaba nole abi erdali.

¹⁷ Ege E uiabi daratager, kega, Nalu mer pe ua batagreiei, pe ua dekase, a uaba pone mokakalam okasosok?

¹⁸ Nerute le uiaba, nei Kaleopa, E abi detager, kega, Nako mama emeri Ieruselema, mama nole umer kak peirdi gaire lu oameda?

¹⁹ E uiabi daratager, kega, Nalu lu? A uiaba de-taut, kega, Abele lu Iesu Nazareta le, E perofeta, E au saserim gaire lu ikeli, pako abara mer Ade ra opem, pako abele ged uridili:

²⁰ Zogozogo le giz, pako meriba tarim le, uiaba ikuar bodomalam eumilu, a uiaba abi satauroem.

²¹ Keriba dikiapor E uerkab Isaraela. A gaire lu uridili, abele gerger thri gerger, abele lu ikeli.

²² Keriba au damreda, uader kosker keribielam, uiaba bakeam banege a aoem;

²³ Uiaba nole erdali abara gem, a uiaba bakeamu abele merkem, kega, Keriba erdali angela giz ui keribim detomereta, E emetu ko eded akaida.

²⁴ Uader keribielam, uiaba bakeamu aoem, uiaba erdali mokakalam kosker detaut: a uiaba nole abi erdali.

²⁵ Ege E uiabi daratagerare, kega, Le paim, a peper nerkep, nole oituli gaire lu uridili gaire perofeta giz etomereti!

²⁶ Abkoreb Keriso kekiam au asias gaire lu mokakalam, a keubu abara zorom tabarki.

²⁷ Epe E uiabi etomereti gaire lu, emetu detali abielam jauali uridili, E ditimeda Mose bakedida perofeta uridili.

²⁸ Ege maike abele uteb ge uiaba bakeamu: epe E mokakalam no bakeamu.

²⁹ Ege uiaba saserim detaut, kega, Debele ma keribim emeri peike: abelelam gerger ise maike kikem. Epe E barot, a uiaba emeri.

³⁰ Ege E eidi eroli okakis uiabim, epe areto erpei, a esoao, a itur, a uiabi naisuerare.

³¹ Epe uiaba pone bakaelei, a abi dasmerei; E uiabielam badimiriklu.

³² Epe uiaba mer atager, kega, Nako meriba nerkep mokakalam ur muige, abuar ge meribi detager gab ge, E meribi detomelu abele jauali?

33 Ui ge ekueilei abele haua ge, akomelei Ierusalemam, a nardarare eleuen le, uiaba etamiare okakis uader uiabi kemem,

34 Ui ge uiabi daratagerare, kega, Ageakar, Opole ko eded akaida, E etomereti Simonaem.

35 A ui ge detautei abele gaire lu ikeli gab ge, a uiabi erdali a areto itur.

36 A uiaba mer batager abele lugelam, a Iesu ekueilu uiabi opem, a uiabi daratagerare, kega, Uerkab uabim.

37 Ege uiaba au geum, a ui dikiaporare uiaba lamar pemi erdarda.

38 Ege E uiabi daratagerare, kega, Nalu uaba okasok? nalugelam uaba nerkep basareda?

39 Debele uaba mamoro dasmer, kara tag peike, pako kara teter, abelelam kaka: uaba kari erpei, a kari dasmer; lamar nole med kak, a nole lid kak, mokakalam uaba kari dasmer.

40 Ege E emetu uiabi daratagerare abele mer, E uiabi natomertare tabara tag, a teter.

41 A uiaba nole oatur kak, abelelam uiaba au sererege, a damared, E uiabi daratagerare, kega, Nako uaba nagri leuer?

42 Ege uiaba abi ikuar nerute lar mog emetu urim, a nerute mog melikerio.

43 Ege E narpeilu, a nareg uiabi opem.

44 A E uiabi daratagerare, kega, Abele mer kaka uabi detagereda, abele kerker kaka uabi kemem, abkoreb iako ageakarem gaire lu uridili emetu detali karielam Mose ra gelar, pako perofeta giz, a Salamo.

45 Epe E depegeli uiaba nerkep, iaueakai uiaba mamoro asoli jauali;

⁴⁶ E uiabi daratagerare, kega, Emetu detali, Abkoreb Keriso asiassi, a thri gerger ko eded akaida eudlam;

⁴⁷ Iaueakai natomertare obazgeda, a adigiri uit ged uridili, abara nei ge, ditimeda Ierusalem.

⁴⁸ Uaba upinati abele lu.

⁴⁹ Dasmer, kaka uabim namarida nerute le, kara Aba uabi uadetomertare: debele uaba emeri abele uteb, nei Ierusalem, iaueakai uaba nagri adigir kotor ge.

⁵⁰ Ege E uiabi ais sor ge, bakedida Bethania: ege tabara tag nagaisilu, E uerkab uiabim.

⁵¹ Ege E uiabim uerkab, E uiabi dikaer, E bakeamu kotorem.

⁵² Ui ge abim esorgiru; a bakomeret Ierusalem, a uiaba au sererege:

⁵³ Uiaba ner kak bakeamu zogo meta, uiaba Ade despered. Amen.

cv

Meriam Mir Bible
The Four Gospels in the Murray Island or Mer
Language of Australia

Public Domain

Language: Meriam Mir (Meriam)

This Bible translation is in the Public Domain (not copyrighted) due to copyright expiration.

2023-04-03

PDF generated using Haiola and XeLaTeX on 22 Feb 2024 from source files dated 31 Aug 2023

333cd95a-a1c6-5b40-8ad9-641bf00decad